

# Jueces

*Iteipan ixhuihua Judá amo quitlantoyaj nochí inintláal*

<sup>1</sup> Quema ya mictoya Josué, nopa israelitame quitlatzintoquilijque TOTECO tlaque ipaquilis para quimatise catlique hueyi familia isoldados achтиhui ma yaca para quinhuilanatij nopa cananeos.

<sup>2</sup> Huan TOTECO quinnanquili: “Achтиhui mon-equi yase tlahuilanatij nopa soldados ipan nopa hueyi familia Judá. Huan inijuanti tlatlanise pampa nijtlalijtoc ininmaco nopa tlali.”

<sup>3</sup> Huan nopa tlayacanani ipan nopa hueyi familia Judá quinnotzque nopa tlayacanani ipan nopa hueyi familia Simeón huan quinlhuijque: “Xihualaca huan techpalehuica para tiquinhuilanatij nopa cananeos catli itztoque ipan nopa tlali catli techtocaros. Huan teipa timechpalehuise tiquinhuilanatij catli itztoque campa elis amoaxca.”

Huan isoldados Simeón nimantzi motemacaque para quinpalehuitij. <sup>4</sup> Huan isoldados Judá tlayacantiyajque huan TOTECO quichijqui ma quintlanica nopa cananeos huan ferezeos. Huan san ipan altepetl Bezac, quinmictijque 10 mil tlacame. <sup>5</sup> Quipantitoj Tlanahuatijquetl Adoni Bezac ipan altepetl Bezac quema tlahuilanayayaj, <sup>6</sup> pero yaya cholo. Huan isoldados Judá huan Simeón

quitoquili que huan quiitzquitoj huan quitzonte-quili que ihueyi macpilhua huan ihueyi xocpilhua. <sup>7</sup> Huajca Tlanahuatijquetl Adoni Bezec quiijto: “Na niquintzontequili jtoc 70 tlanahuatiani ininhueyi macpilhua huan ininhueyi xocpilhua, huan niquinchihualli ma quicuaca san nopa pan tlatlapatztli catli huetzqui nomesaitla, huan ama Toteco Dios nechcuepilijtoc. Techchihuilijtoque san se quen na niquinchihuili sequinoc.”

Huan teipa nopa soldados quihuicaque altepetl Jerusalén huan nopona mijqui.

*Iteipan ixhuihua Judá quitlanque Hebrón huan Jerusalén*

<sup>8</sup> Isoldados Judá nojquiya quinmictijque miyac Jerusalén ehuani ica machete. Quitlanque nopa altepetl huan quitlatijque.

<sup>9</sup> Teipa isoldados Judá yajque quinhuilanatoj nopa cananeos catli itztoyaj ipan tepeme huan ipan tlali Neguev. Nojquiya quinhuilanatoj campa nopa tlamayamitl nechca hueyi atl.

<sup>10</sup> Huan nojquiya yajque quinhuilanatoj nopa cananeos catli itztoyaj ipan altepetl Hebrón. (Achtihuiya Hebrón itoca eltoya Quiriat Arba.) Huan nojquiya quinmictijque nopa huejcapantique tlacame Sesai, Ahimán huan Talmai.

*Otoniel quitlanqui altepetl Debir*

<sup>11</sup> Teipa quihuilanatoj nopa altepetl Debir catli achtihuiya quitocaxtiyaya Quiriat Sefer. <sup>12</sup> Huan Caleb quinilhui: “Yaya catli tlayacanas para quihuilanati huan quitlanis altepetl Debir, na nijmac-tilis noichpoca Acsa para ma eli isihua.”

<sup>13</sup> Huan tlayacanqui para tlatlaniti Otoniel catli eliyaya icona Cenaz catli eliyaya iicni teipan ejquetl Caleb. Huajca Caleb quimactili Otoniel iichpoca para ma eli isihua. <sup>14</sup> Huan quema nopa ichpocatl Acsa yohuiyaya ihuaya Otoniel, quicamanalhui ihuehue pampa moilhui cuali ma quitlajtlanjtehua itata se quentzi más tlali. Huajca teipa nopa ichpocatl iseltzi temoc tlen iburro huan quinechcahuito itata. Huan quema Caleb quiitac iichpoca, quitlatzintoquili:

—¿Tlaque tijnequi?

<sup>15</sup> Huajca nopa ichpocatl quiilhui itata:

—Tijpixtoc hueyi moyolo nohuaya huan techmacatoc se tlali campa nopa huactoc tlali Neguev. Pero se favor, nojquiya techmaca se quentzi tlali campa meya atl.

Huajca Caleb quimacac nopa amelme catli eltoya ica tlatzintla huan ica huejcapa.

### *Catli quitlanque isoldados Judá huan Benjamín*

<sup>16</sup> Huan quema isoldados nopa hueyi familia Judá calajque ipan nopa huactoc tlali ica tlatzintla campa itoca Arad, nojquiya yohuiyayaj inihuaya iteipan ixhuihua imonta Moisés catli inintoca ceneos. Pampa nopa ceneos quistejque campa quipixtoyaj ininchajchaj ipan nopa altepetl tlen apachi cuame huan yajque mocahuatoj inihuaya imasehualhua nopa hueyi familia Judá ipan inintlal.

<sup>17</sup> Huan teipa isoldados Judá yajque inihuaya isoldados nopa hueyi familia Simeón san quen mocajtoyaj huan quinhuilanatoj nopa cananeos catli itztoyaj ipan altepetl Sefat huan quintlamimictijque. Huajca nopa altepetl

quitocaxtijque Horma (Horma quinequi quiijtos “tlamimictoque”). <sup>18</sup> Huan isoldados Judá nojquiya quintlanque nopa altepeme Gaza, Ascalón huan Ecrón ica nochí nopa pilaltepetzitzti catli mocajqui nechca. <sup>19</sup> Huan TOTECO nochipa itztoya ihuaya iteipan ixhuihua Judá, huan yeca quintzontlamiltijque nochí masehualme catli itztoyaj campa tepeyo huan mocuilijke nopa tlali. Pero amo huelque quintojtocaj inijuanti catli itztoyaj ipan tlamayamitl pampa quipixtoyaj topos carrojme.

<sup>20</sup> Huan nopa altepetl Hebrón quimactilijke Caleb quen Moisés quiijtojtoya ma quichihuaca. Huan itztoyaj nopona iniixhuihua nopa eyi itelpocahua Anac catli tlahuél huejcapantique, pero Caleb quinmicti.

### *Benjaminitame amo quitlantoyaj nochí inintla*

<sup>21</sup> Pero iixhuihua Benjamín amo huelque quin-quixtiaj ipan Jerusalén nopa jebuseos. Yeca nopa jebuseos huan iixhuihua Benjamín itztoque san sejco nopona hasta ama.

### *Iteipan ixhuihua José quitlanque Betel*

<sup>22</sup> Nojquiya iixhuihua José quihiulanatoj altepetl Betel huan TOTECO itztoya inihuaya.

<sup>23</sup> Huan quintitlanque tlacame ichtacatzi ma tlachiyatiq ipan altepetl Betel. (Betel achtihuiya itoca eliyaya Tlahuili.) <sup>24</sup> Huan nopa tlacame catli yajque tlapijpiyatij quiitaque se tlacatl catli quisayaya ipan nopa altepetl huan quiilhuijque: “Sintla technextilis quenicatza huelis ticalaquise ipan ni altepetl, amo tleno timitzchihuilise quema tijtlanise.”

<sup>25</sup> Huan quinnextili canque huelis calaquise ipan nopa altepetl. Huan teipa iixhuihua José calajque huan quintlamimictijque ica machete nochí catli itztoyaj nopona. Pero nopa tlacatl catli quinpalehui quicajque ma yohui ica nochí ifamilia. <sup>26</sup> Huan nopa tlacatl yajqui ipan inintal heteos, huan nopona quipehualti seyoc altepetl huan quitocaxti Tlahuili. Huan hasta ama quej nopa itoca.

*Iixhuihua Manasés amo quitlanque nochí inintal*

<sup>27</sup> Nojquiya iixhuihua Manasés amo huelque quintojtocaj catli itztoyaj ipan altepeme Bet Seán, Taanac, Dor, Ibleam, Meguido huan pilaltepetzitzí nechca. Yeca nopa cananeos noja mocajque ipan nopa tlali. <sup>28</sup> Pero quema nopa israelitame pejque motlananaj huan quipiyaj chicahualistli, quinchihualtijque nopa cananeos ma quintequipanoca san tlapic, pero amo huelque quintojtocaj.

<sup>29</sup> Nojquiya iixhuihua Efraín amo huelque quintojtocaj nopa cananeos catli itztoyaj ipan altepetl Gezer. Huajca mocajque nopona inihuaya.

*Catli quitlanque nopa sequinoc huejhueyi familias*

<sup>30</sup> Nojquiya iixhuihua Zabulón amo huelque quintojtocaj catli itztoyaj ipan altepetl Quitrón, niyon ipan Naalal. Huajca nopa cananeos nopona mocajque inihuaya, pero nopa israelitame quinchihualtijque ma quintequipanoca san tlapic.

<sup>31</sup> Nojquiya iixhuihua Aser amo huelque quintojtocaj catli itztoyaj ipan altepeme Aco, Sidón,

Ahlab, Aczib, Helba, Afec huan Rehob. <sup>32</sup> Huajca iixhuihua Aser mocajque inihuaya nopa cananeos catli itztoyaj ipan nopa tlali pampa amo huelque quintojtocaj.

<sup>33</sup> Nojquiya iixhuihua Neftalí amo huelque quintojtocaj catli itztoyaj ipan altepetl Bet Semes, niyon ipan Bet Anat. San mocajque nopona inihuaya nopa cananeos pero quinchihualtijque ma quintequipanoca chicahuac.

<sup>34</sup> Nopa amorreos quinchihualtijque iixhuihua Dan ma mocahuaca ipan tepeme huan amo quincahuilijque ma itztoca campa tlamaya. <sup>35</sup> Huan nopa amorreos teipa moaxcatijque nopa tepetl Heres, huan altepeme Ajalón huan Saalbim nojquiya. Pero quema iixhuihua José pejque motlananaj, quinchihualtijque nopa amorreos ma quintequipanoca chicahuac. <sup>36</sup> Huan ininnepa nopa amorreos pejejqui campa nopa tlaixtlejcolis catli itoca Acrabim huan yajqui hasta Sela huan más ica huejcapa.

## 2

### *Itequihua TOTECO monexti ipan Boquim*

<sup>1</sup> Huan itequihua TOTECO hualajqui tlen altepetl Gilgal huan ajsic altepetl Boquim, huan quinilhuito nopa israelitame: “Na nimechquixti ipan tlali Egipto huan nimechhualicatoc ipan ni tlali catli inihuaya nimocajqui niquinmacas amohuejapan tatahua. Nimechilhui amo quema niffsosolos nopa camanal sencahualli catli nijchijqui amohuaya. <sup>2</sup> Nojquiya nimechilhui para

amojuanti amo quema xijchihuaca niyon se camanali ininhuaya nopa masehualme catli nica itztoque. Nimechilhui monequi xijsosoloca intlaixpa. Pero amo antechneltoquilijque catli nimechnahuati. ¿Para tlen ya nopa anquichijque? <sup>3</sup> Huajca pampa amo antechneltocatoque, ama amo niquintojtocas amoixpa nopa masehualme catli ehuaj ipan nopa altepeme. Huan inijuanti anmechcuesolmacase quen se huitzli catli calaqui ipan amoicxi, huan inintlaixcopincayohua anmechmasiltise ipan tlajtlacoli.”

<sup>4</sup> Huan quema itequihua TOTECO tlanqui camanalti, nochí nopa israelitame pejque chocaj chicahuac. <sup>5</sup> Huan nopona quitocaxtijque Boquim. (Boquim quinequi quiijtos: “Chocani”.) Huan nopona quitencajque tlacajcahualistli iixpa TOTECO.

### *Josué mijqui*

<sup>6</sup> Huan Josué quinmajcajqui nochí nopa israelita soldados, huan sese inijuanti yajqui para moaxcatiti nopa tlali campa quitocarohua. <sup>7-9</sup> Huan Josué, icone Nun, catli eliyaya itequipanojca TOTECO, mijqui quema quipiyayaya 110 xihuitl. Huan quitojque ipan itlal ipan altepetl Timnat Sera campa nopa tepeme ipan inintlal iixhuihua Efraín. Eltoya ica norte tlen tepetl Gaas. Huan nopa israelitame quihueyichihuayayaj TOTECO nochí tonali quema Josué itztoya. Nojquiya quihueyichijque teipa quema noja itztoyaj sequin huehue tlacame catli quiitztoyaj nopa huejhueyi tetzatl catli TOTECO quinchihuili israelitame achtihuiya.

**10** Pero teipa tlami mijque nochí nopa masehualme catli quiitztoyaj Josué. Huan iniixhuihua catli yancuic tlacajtiyajque, amo quiiximatiyayaj TOTECO niyon amo quimatiyayaj nopa huejhueyi tlamantli catli quinchihuilitoya israelitame.

*Nopa israelitame quicajtejque TOTECO*

**11** Yeca iniixhuihua nopa israelitame pejque quichihuaj catli amo cuali iixpa TOTECO. Pejque quinhueyichihuaj nopa tlaixcopincayome tlen Baal ipan sese altepetl. **12** Quena, quitlahuelcajque TOTECO, yaya catli eliyaya ininDios intatahua huan catli quinquixtijtoya ipan tlali Egipto. Huan quintoquilijque tlaixcopincayome catli amo neli huan quinhueyichijque ininteteyohua nopa masehualme catli itztoyaj nechca. Quej nopa quichijque ma cualani TOTECO ininhuaya. **13** Quena, nopa israelitame quicajtejque TOTECO huan quinhueyichijque nopa teteyome Baal huan Astarot. **14** Huajca TOTECO tlahuel cuanqui ininhuaya huan quintemactili ininmaco tlachtequini huan quintlami tlachtequili jque. Huan nojquiya Toteco quintemactili ininmaco inincualancaitacahua huan yeca ayacmo huelque ininhuaya motlalise para quinhuilanase.

**15** Huan campa hueli campa yohuiyayaj nopa israelitame para tlahuilanatij, TOTECO quintzacuiliyaya para amo huelis tlatlanise. TOTECO quinilhuijtoya para quinpanosquía huejhueyi tlaijiyohuclistli. Quena, quintlajtolcahuili para quej nopa elis huan yeca quej nopa ininpantic.

*TOTECO pejqui quintequitlalía jueces ipan tlali Israel*

<sup>16</sup> Teipa TOTECO quintlali jueces para quinmanahuise israelitame ininmaco inincualancaitacahua. <sup>17</sup> Pero amo quintlacaquijque nopa jueces. Quinhueyichijque tlaixcopincayome catli amo Dios huan motlancuaquetzque iniixta. Ininhuejapan tatahua quitoquilijque itlanahuatilhua TOTECO, pero inijuanti, amo. Nimantzi quicajtejque. <sup>18</sup> Huan quema TOTECO quitlananqui se juez para quinyacanas, ihuaya itztoya nopa juez para quipalehuis. Huan quinmanahui israelitame ininmaco inincualancaitacahua nochitonalí quema nopa juez itztoya. TOTECO quintlasojtlayaya huan quinmanahuiyaya israelitame pampa quincaquiyaya quenicatza ayijtiyayaj quema quintlaijijohuiltyayaj inincualancaitacahua. <sup>19</sup> Pero quema sesen juez miquiyaya, nopa israelitame sempa moicancuepayayaj huan más fiero tlachihuayayaj que inintatahua quichijtoyaj. Quintequipanohuayayaj huan quihueyichihuayayaj tlaixcopincayome catli amo neli. Amo quinequiyayaj quicahuase iniojhui catli fiero, niyon nopa fiero tlamantli catli quichihuayayaj.

<sup>20</sup> Huan TOTECO tlahuel cuanqui ininhuaya nopa israelitame huan quijito: “Ni masehualme quiixpanotoque nopa camanali catli nijsencajqui ininhuaya inintatahua huan amo quinequij nechneltoquilise, <sup>21</sup> huajca na ayacmo niquinpalehuis para ma quintojtocaca nopa masehualme ipan campa hueli altepeme catli Josué ayamo quintlantoya quema mijqui.”

<sup>22</sup> Huan TOTECO quincahuili nopa

masehualme ipan inintlal para quinyejyecos israelitame. Quinequiyaya quiitas sintla noja quitoquilise iojhui quen achthuiya quichijtoyaj ininhuejcapan tatahua, o amo. <sup>23</sup> Huan yeca TOTECO amo quicahuili Josué ma quintojtoca nopa masehualme ipan campa hueli altepeme pampa amo quinmactili imaco. San quincahuili ma mocahuaca nopona campa itztoyaj nopa israelitame.

### 3

*TOTECO quincajtejqui sequinoc masehualme ipan nopa tlali*

<sup>1</sup> Ya ni nopa masehualme huan inintlanahuatijahua catli quincajqui TOTECO para ica quinyejyecos nopa israelitame pampa nopa israelitame catli itztoyaj ipan nopa tonali amo tleno quimatiyayaj tlen tlahuilanalistli. Inijuanti ayamo eliyayaj huejhueyi para tlahuilanase quema inintatahua tlahuilanque para quitlanise tlali Canaán. <sup>2</sup> Yeca TOTECO quincahuili ni israelitame ma tlahuilanaca para quitlanise inintlal para quej nopa quineltoCASE pampa ayamo quimatiyayaj tlen tlahuilancayotl.

<sup>3</sup> TOTECO nopona quincajqui nopa filisteos ica macuili inintlanahuatijahua, huan sequinoc masehualme catli inintoca nopa cananeos, sidonios huan heveos catli itztoyaj ipan nopa tepeme catli pejqui ica Líbano ipan tepetl Baal Hermón huan onajsi altepetl Hamat.

<sup>4</sup> TOTECO quinequiyaya ni masehualme ma quinyejyecoca israelitame para quiitas sintla nelía quineltoCASE nopa tlanahuatilme catli

quinmacatoya ininhuejapan tatahua ica Moisés,  
o amo quineltocase.

<sup>5</sup> Huan nopa israelitame itztoyaj inihuaya  
nopa cananeos, heteos, amorreos, ferezeos,  
heveos huan jebuseos. <sup>6</sup> Huan nopa israelitame  
mosihuajtijque huan monamictijque inihuaya  
nopa sequinoc xinachtli masehualme. Huan  
ica ya nopa nojquiya pejque quinhueyichihuaj  
ininteteyohua.

### *Otoniel, nopa achtihui juez*

<sup>7</sup> Huajca nopa israelitame quichijque catli amo  
cuali iixpa ininTECO Dios huan ayacmo quiel-  
namijque. Huan pejque quinhueyichihuaj nopa  
tlaixcopincayome catli itoca Baal huan Asera.

<sup>8</sup> Huan yeca TOTECO pejqui cualani ica  
nopa israelitame huan quintemactili imaco  
Tlanahuatijquetl Cusan Risataim catli hualajqui  
tlen tlali Mesopotamia, huan nopa israelitame  
quitequipanajque san tlapic para chicueyi  
xihuitl. <sup>9</sup> Huajca nopa israelitame pejque  
quitzajtzilíaj TOTECO huan TOTECO quitlananqui  
se tlamanahuijquetl para ma quinmanahui.  
Yaya itoca Otoniel huan elqui icono Cenaz catli  
eliyaya iicni teipan ejquetl Caleb. <sup>10</sup> Toteco Itonal  
motlali ipan Otoniel para quinyacanas, huan  
Otoniel elqui juez huan quintlajtolsencajqui nopa  
israelitame. Huan quema yajqui para tlahuilanati  
ica inincualancaitacahua, Toteco quipalehui ma  
quitlani Tlanahuatijquetl Cusan Risataim catli  
hualajqui tlali Mesopotamia.

<sup>11</sup> Huan teipa oncac tlasehuilistli ipan nopa tlali para 40 xihuitl. Huan teipa mijqui Otoniel catli eliyaya icona Cenaz.

*Aod, nopa ompa juez, quinmanahui israelitame tlen moabitame*

<sup>12</sup> Huan nopa israelitame sempa tlajtlacolchijque iixpa TOTECO. Huan yeca TOTECO quimacac más chicahualistli Eglón nopa tlanahuatijquetl ipan tlali Moab quema quinhuilanayaya israelitame pampa amo cuali quichijtoyaj iixpa.

<sup>13</sup> Huan Eglón quinnotzqui nopa amalecitame huan amonitame huan quinhuilanque nopa israelitame huan quintlanque huan moaxcatijque nopa altepetl tlen apachi cuahuitl. <sup>14</sup> Huan nopa israelitame quitequipanojque Eglón san tlapic para 18 xihuitl.

<sup>15</sup> Huan nopa israelitame pejque quitzajtziliáj TOTECO huan TOTECO quitlananqui se tlamanahuijquetl para ma quinyacana huan ma quinmanahui. Huan nopa tlacatl itoca eliyaya Aod huan elqui icona Gera se iixhui Benjamín. Huan yaya maopochtic. Huan se tonali nopa israelitame quititlanque Aod ma quihiuiquili iniimpuesto nopa Tlanahuatijquetl Eglón. <sup>16</sup> Huan Aod mochihuilitoya se machete catli oncac tlatequi catli san tlajco metro ihuehueyaca, huan quilpi itzinquechtla tlatzintla iyoyo ica inejmac. <sup>17</sup> Teipa quihiuicac nopa tomi huan quimacato Tlanahuatijquetl Eglón ipan tlali Moab. Huan Tlanahuatijquetl Eglón eliyaya se tlacatl catli tomahuac. <sup>18</sup> Huan quema Aod ya quimacatoya nopa tomi, quisqui para ichaj. Pero

teipa quema Aod ajsito altepetl Gilgal campa oncayaya teteyome, quinmajcajqui nopa tlacame catli ihuaya yohuiyaya. <sup>19</sup> Huan mocuepqui iseltzi campa itztoya Tlanahuatijquetl Eglón huan quiilhuito:

—Tlanahuatijquetl, nijpiya se camanali catli monequi nimitzilhuis ichtacatzí.

Huajca Tlanahuatijquetl Eglón quinilhui itequipanojcahua ma amo molinica huan ma quisaca calteno. <sup>20</sup> Huan Tlanahuatijquetl Eglón mosehuijtoya iseltzi ipan icuarto huejcapa campa más tlassesestoc, huan nopona Aod calajqui huan quiilhui:

—Ni camanali catli nijhualica, nechmacatoc Toteco Dios para ta.

Huan Tlanahuatijquetl Eglón moquetztquisqui campa mosehuiyaya ipan isiya para quiselis. <sup>21</sup> Huajca Aod catli maopochtic quiqxiti imachete catli quitlalijtoya ipan itzinquechtla ica inejmac huan quisentlapalhuili Tlanahuatijquetl Eglón ipan iihti. <sup>22</sup> Quisenlapalhuili chicahuac hasta itzincuayo nopa machete tlami calaquito ipan iihti. Huan pampa tomahuac, motzajqui hasta ayacmo nesqui nopa machete huan Aod ayacmo quiqxtili. Huan nopa machete quisqui itzinpa. <sup>23</sup> Teipa Aod quisqui campa calajqui ipan nopa cuartos. Huan quitzajqui nopa puerta ica llaves huan cholo ipan ventana.

<sup>24</sup> Huan quema ya quistoya Aod, hualajque itequipanojcahua Tlanahuatijquetl Eglón huan quiitaque nopa ipuerta tzactoc. Huan inijuanti moilhuijque huelis cuatenpanohua huan yeca itztoya nepa ipan nopa cuarto, yeca san quichixque.

**25** Teipa quema cuesijtoyaj quichiyaj huan qui-  
itaque amo quisayaya huan amo quitlapohuayaya  
ipuerta, huajca quicuique illaves huan quitlapo-  
jque nopa cuapuerta huan quipantijque inint-  
lanahuatijca huetztoc tlalchi cuali mictoc.

**26** Huan quema inijuanti quichiyayaj para  
calaquise, Aod cholo huan ya panotoya campa  
nopa teteyome huan aj sito hasta Seirat. **27** Huan  
quema aj sito campa israelitame ipan nopa te-  
peme ipan inintlal iixhuihua Efraín, quipitzqui se  
cuacuajtli para ma mosentilica israelitame. Huan  
inijuanti hualajque huan hualtemoque ihuaya  
Aod catli quinyacanayaya.

**28** Huajca Aod quinilhui: “Techtoquilica  
ma tiquinhuilanatij nopa moabitame, pampa  
TOTECO Dios techmactilis tomaco inijuanti catli  
tocualancaitacahua.”

Huajca nopa israelitame quitoquilique huan  
quitzajque campa quimatque quiixcotonase  
hueyatl Jordán huan amo aqui quicahuilijque  
ma pano. **29** Ipan nopa tonali quinmictijque quen  
10 mil moabita soldados catli más tejteque huan  
más quimatque tlahuilanaj, huan amo aqui cholo.  
**30** Huajca quej nopa israelitame quintlanque  
moabitame. Huan teipa oncac tlasehuilistli para  
80 xihuitl ipan nopa tlali.

*Samgar, nopa expa juez, quinmanahui israeli-  
tame tlen filisteos*

**31** Huan nopa juez catli teipa monexti elqui  
Samgar, icono Anat. Huan Samgar quinmicti 600  
filisteos ica icamachal omiyo se huacax huan quej  
nopa quinmanahui nopa israelitame.

## 4

*Débora, nopa najpa juez, quitlanqui Sísara*

<sup>1</sup> Huan quema ya mictoya Aod, nopa israelitame sempa pejque quichihuaj catli amo cuali iixpa TOTECO. <sup>2</sup> Huan TOTECO quintemactili imaco Jabín inintlanahuatijca cananeos, yaya catli mosehui para tlanahuatis ipan altepetl Hazor. Huan Sísara elqui itlayacanca tlen isoldados huan itztoya ipan altepetl Haroset Goim. <sup>3</sup> Huan Tlanahuatijquetl Jabín chicahuac quintlaijiyohuilitijtoya nopa israelitame para 20 xihuitl huan quinpiyayaya 900 tepos carrojme para ica tlahuilanase. Huajca nopa israelitame quitzajtzilijque TOTECO para ma quinpalehui.

<sup>4</sup> Huan ipan nopa tonali quintlajtolsencahuayaya nopa israelitame se sihua juez catli itoca Débora. Yaya itztoya se tlajtol pannextijquetl huan isihua Lapidot. <sup>5</sup> Débora nochipa mosehui para tetlajtolsencahuas campa nochi quitocaxtiyayaj “Débora icoyol”. Nopa coyol cuahuitl eltoya ipan nopa tepeme ipan tlali Efraín tlatlajco altepeme Ramá huan Betel. Huan nochi israelitame conitayayaj Débora para ma quintlajtolsencahua.

<sup>6</sup> Huan se tonal Débora tlanahuati ma quinotzatij Barac, icono Abinoam, catli itztoya ipan altepetl Cedes ipan inintlal iixhuihua Neftalí. Huan quema hualajqui, Débora quiilhui:

—TOTECO catli itztoc toDios tiisraelitame mitznahuatía xiquisentili 10 mil tlacame catli hualahuij ipan nopa huejhueyi familias Neftalí huan Zabulón huan xiquiryacana hasta

nopa tepetl Tabor. <sup>7</sup> Nopona anquinhuilanase isoldados Tlanahuatijquetl Jabín huan inintlayacanca catli itoca Sísara. Huan Toteco quichihuas ma monechcahui campa ta campa hueyatl Cisón ica itlahuilanca carros huan ica tlahuel miyac isoldados. Huan quichihuas ma huetzica momaco huan anquintlanise.

<sup>8</sup> Huan Barac quiijto:

—Sintla ta tiyas nohuaya, niyas, pero sintla amo nohuaya tiyas, na amo niyas.

<sup>9</sup> Huan Débora quiilhui:

—Cualtitoc, niyas mohuaya. Pero pampa amo timotemamac titlayacanas, quema huetzis Sísara huan isoldados, masehualme amo mitzhueytلالise para tijtlanqui ta. Pampa elis se sihuatl catli TOTECO quitemactilis Sísara imaco.

<sup>10</sup> Huan Barac quinnotzqui iixhuihua Zabulón huan Neftalí ma mosentilica ipan altepetl Cedes. Huan 10 mil soldados mosansejcotilijque huan quistejque ica Barac quen inintlayacanca. Huan Débora inihuaya yajqui. <sup>11</sup> Huan Heber nopa quenita moiycatlajtoya tlen sequinoc quenita masehualme. (Quenitame elque inintoca iixhuihua itex Moisés.) Huan Heber quiquetziyajqui ichaj tlen yoyomitl campa hueli huan ajsite hasta campa nopa hueyi ahua cuahuitl catli itoca Zanaim catli eltoya nechca altepetl Cedes. <sup>12</sup> Huan Sísara quicajqui para Barac, icone Abinoam, yajtoya ipan tepetl Tabor. <sup>13</sup> Huajca Sísara quinsentili noch 900 itlahuilanca carros huan noch isoldados huan quistejqui inihuaya tlen altepetl Haroset Goim huan ajsitej campa nopa hueyatl Cisón.

**14** Huajca Débora quiilhui Barac:

—Xiya amantzi, pampa ama TOTECO mitzya-cantiyas huan mitzmactilis Sísara momaco.

Huajca Barac temoc ipan tepetl Tabor ica 10 mil soldados. **15** Huan TOTECO quinchihuaulti Sísara huan isoldados huan catli ihuaya itztoyaj ipan tlahuilanca tepos carrojme tlahuel ma momajmatica hasta mohuihuichijque. Huan Barac huan isoldados pejque quinmictíaj ica machete. Huajca Sísara temoc ipan icarro huan cholojetjqui san iicxipa. **16** Huan Barac huan isoldados quintoquilijtiyajque isoldados huan catli itztoyaj ipan tlahuilanca carrojme hasta altepetl Haroset Goim. Huan amo mocajqui itztoc niyon se isol-dado Sísara. Nochi mijque ica machete. **17** Huan Sísara cholo san iicxipa huan yajqui campa nopa cali tlen yoyomitl catli elqui iaxca Jael catli isihua Heber, nopa quenita. Yajqui ichaj pampa Heber huan Tlanahuatijquetl Jabín ipan altepetl Hazor quichijtoyaj se camanali para amo oncas cualantli ica inijuanti.

**18** Huajca nopa sihuatl, Jael, quisqui ichaj para quiselis Sísara huan quiilhui:

—Xicalaqui nica, notlanahuatijca. Amo xima-jmahui, pampa amo aqui mitzassis nica.

Huan yaya calajqui ichaj tlen yoyomitl para motlatis, huan Jael quipijqui ica se tlaquemitl.

**19** Huan Sísara quitlajtlani quentzi atl pampa tlahuel amiquiyaya.

Pero nopa sihuatl quitlapo se cuetlaxtli catli ipan quitectoya lechi huan quimacac ma quiji huan sempa cuali quipijpijqui. **20** Huan Sísara quiilhui nopa sihuatl:

—Ximoquetza puertajteno huan sintla acajya hualas huan mitzlatzintoquilis sintla nica nimotlatijtoc, xiquilhui para amo.

<sup>21</sup> Huan tlahuel cochqui pampa nelía siyajtoya. Huan Jael, isihua Heber, quicuic se cuaestaca huan se martillo huan ica yolic monechcahuijtiyajqui campa ya. Huan quiquechili nopa cuaestaca ipan itzonteco huan quisentlapalhuili hasta mocajqui tlatzquitoc ipan tlali, huan nimantzi mijqui.

<sup>22</sup> Huan ajcico Barac catli quitemohuayaya Sísara huan Jael quinamiquito huan quiilhui:

—Xihuala huan nimitznextilis nopa tlacatl catli tijtemohua.

Huan calajqui Barac huan quiitac Sísara cuali mictoc ica se cuaestaca ipan itzonteco. <sup>23</sup> Huajca quej nopa iniixtla nopa israelitame Toteco Dios quintlanqui isoldados Jabín, inintlanahuatijca cananeos. <sup>24</sup> Huan mojmostla nopa israelitame más quipixtiyajque chicahualistli iixpa Jabín inintlanahuatijca cananeos, huan teipa quitzontlamiltijque.

## 5

### *Inihuica Débora huan Barac*

<sup>1</sup> Ipan nopa tonali Débora ihuaya Barac, catli eliyaya icona nopa Abinoam, quej ni huicaque:

<sup>2</sup> “Ma tijhueyichihuaca TOTECO pampa nopa tlayacanca israelitame moneltlalijque, huan nopa israelitame nimantzi motemacaque para tlahuilanatij.

<sup>3</sup> Techtlacaquilica, antlanahuatiani huan amojuanti catli anquihuicaj tequiticayotl,

huan na nijhuicatis TOTECO, yaya catli toDios  
tiisraelitame.

Quena, yaya nijhuicatis huan nijhueyitlalis.

<sup>4</sup> TOTECO, quema ta tiquisqui ipan Seir huan tine-  
jnentiyajqui ipan tlali Edom,  
molini tlali huan tlen nopa mixtli ipan ilhuicactli  
tlaquiyajqui chicahuac.

<sup>5</sup> Nopa tepeme huihuipicaque moixpa TOTECO,  
ta catli techmocuitlahuía titlali Israel ehuani.

Quena, tepetl Sinaí nojquiya huihuipicac moixpa.

<sup>6</sup> Ipan nopa tonali quema noja itztoya Sam-  
gar, icono Anat, hasta quema itztoya Jael,  
nochi israelitame quicajtejque nochi hue-  
jhueyi ojme huan ayacmo nejnenque no-  
pona pampa momajmatiyayaj para quint-  
lachtequilise.

San quitoquilijque piloitzitzi catli huijcoltic para  
motlatijtiyase.

<sup>7</sup> Nochi paquilibrium tlantoya huan niyon se israelita  
amo itztoya ica yejectzi hasta na, niDébora,  
nimotlananqui quen nieliyaya ininnana is-  
raelitame.

<sup>8</sup> Israelitame quinhueyichihuayayaj tlaixcopin-  
cayome catli amo Dios.

Nochi sequinoc altepetl ehuani techhuilanque  
hasta topuertaj teno.

Nopa fiero tlacame catli technahuatiyayaj amo  
techcahuiliyayaj ma tijpiyaca niyon  
se totepostzajca o tepostli catli ica  
timomanahuisquíaj.

Amo oncac niyon se ipan 40 mil israelitame.

<sup>9</sup> Nelía nipaqui ica antlanahuatiani ipan tlali Is-  
rael.

Nijtlascamati TOTECO por amojuanti.

Anyajque ipan tlahuilanalistli ica nochí amoyolo.  
Ma tijhueyichihuaca TOTECO.

**10** Nochi tiisraelitame ma tijhueyichihuaca  
TOTECO.

Nochi catli ricos huan catli tlejcoj ipan burrojme  
chipahuaque,  
huan catli mosehuíaj campa tlatzotzoltic ma  
paquica.

Huan nojquiya ma huicaca nochí catli teicneltzitz  
huan monequi nejnemise.

Nochi ma tihuicaca ica tlascamatili.

**11** Inijuanti catli quimatij tlahuilanaj sempa  
mosentilíaj campa ameli ininhuaya catli  
quinamacaj ininborregojhua.

Nopona nopa soldados catli tlatlantoque tepo-  
huilíaj quenicatza nelía hueyi catli TOTECO  
quinchihuili, masque san teicneltzitz.

TOTECO quichijqui para tiisraelitame ma titlat-  
lanica tlahuel.

Huan huajca ama nochí tiisraelitame, tojuanti  
catli tiimasehualhua TOTECO,  
sempa timosehuíaj campa puerta huan tiitztoque  
ica yejyectzi.

**12** Xiisa Débora.

Xiisa huan xihuica se huicatl.

Huan ta Barac, tiicone Abinoam, ximotlanana.

Xiquinhuica nopa masehualme catli tiquinitzqui-  
jtoc ipan tlahuilancayotl.

Ma mitztequipanotij.

**13** Temoque nopa israelita tlacame catli  
motemacayayaj.

Yajque mohuilanatoj ininhuaya inincualancaitac-  
ahua.

Nopa tlacame catli iaxcahua TOTECO motec-  
panque huan yajque,  
masque amo nesiyaya sintla huelis tlatlanise.

<sup>14</sup> Hualajque israelita tlacame tlen tlali Efraín  
campa nopa amalecitame achtilui itztoyaj.  
Huan quintoquiliijiyajque isoldados tlen nopa  
hueyi familia Benjamín.  
Nopa tlanahuatiyca israelitame hualajque tlen it-  
lal Maquir.

Tlacame tlen nopa hueyi familia Zabulón hualte-  
moque.

<sup>15</sup> Nojquiya nopa tequitini huan soldados tlen  
nopa hueyi familia Isacar temoque hasta  
nopa tlamayamitlihuaya Débora.

Huan iteipan ixhuihua Isacar quipalehuijque  
Débora huan Barac quipalehui nojquiya.

Quena, moisihuiltijque para tlapalehuise.

Pero iixhuihua Rubén amo yajque.

<sup>16</sup> ¿Para tlen mocajque ininchaj iixhuihua Rubén  
campa tzactoque ininborregojhua?

¿Huelis san quintlacaquiliyaj nopa  
tlamocuitlahuiani quema quinnnotzayayaj  
inintlapiyalhua ica tlapitztli?

Iixhuihua Rubén amo pajca itztoque para amo  
yajque.

<sup>17</sup> Iixhuihua Galaad mocajque ne seyoc inaliyo  
Jordán huan iixhuihua Dan mocajque  
campa nopa barcos.

Iixhuihua Aser mocajque iteno hueyi atl huan  
amo mijcuinijque campa itztoyaj.

San mosiyajquetzayayaj.

<sup>18</sup> Pero iixhuihua Zabulón ihuaya Neftalí, ini-  
juanti, quena.

Yajque tlahuilanatoj huan amo quichihuilijque  
cuenta sintla miquisquíaj.

<sup>19</sup> Huajca nopa tlanahuatiani tlen cananeos hualajque tlahuilanacoj  
nechca altepetl Taanac campa pehua nopa atl tlen  
altepetl Meguido.

Pero amo tleno quitlanque.

Amo quihuicaque niyon se tomi.

<sup>20</sup> TOTECO huan nochí sitlalime ipan ilhuicactli  
techpalehuijque para tijtlanise Sísara.

<sup>21</sup> Elqui quej nopa atlajtli Cisón tlejcoc miyac huan  
nochí quinhuicac.

Quena, quinhuahuatatzqui nochí ininmijcatzitzí.  
(Ma quipiya fuerza noyolo para nijtlamiltis ni  
nohuica.)

<sup>22</sup> Huajca caquistic nopa cahuayo tecactli pampa  
motlalojtiyajque.

Masque tlahuel motemacayayaj nopa soldados  
ipan inincahuayos, quistejque ica majmajtli.

<sup>23</sup> Itequihua TOTECO quijito: ‘Xiquintelchihua  
catli ehuaj Meroz.’

Ma itztoca senquistoc tlatelchihualme catli no-  
pona itztoque,  
pampa amo hualajque quipalehuicoj TOTECO  
para quinhuilanase icualancaitacahua  
catli nelía elque tejtetique.

<sup>24</sup> Pero niquijtohua tlahuel xijtiochihua nopa si-  
huatl Jael, isihua Heber, nopa quenita.

Más ma quitiochihua Jael que nochí sihuame catli  
mocahuaj ipan yoyon calme.

<sup>25</sup> Sísara quitlajtlani atl huan Jael quimacac lechi.  
Ipan se taza catli yejyectzi, quimacac crema.

**26** Ica se imax quicuic nopa cuaestaca huan  
ica inejmac quicuic se martillo catli ica  
quimaquili Sísara ipan itzonteco.

Quicuacoyoni huan panoc ipan itzonteco nopa  
cuaestaca.

**27** Huan nopona campa huetztoya, mijqui.

Quena, iicxitla Jael huetztoya huan nopona mi-  
jqui.

**28** Inana Sísara motequipachohuayaya huan  
tlachiyayaya

ipan ventana para quiitas sintla huala.

Moilhuiyaya: ¿Para tlen amo huala Sísara ica  
icarro?

¿Para tlen icarro huejcahua huan amo caquisti  
para huala ica cahuayo tecactli?

**29** Huan inana moilhuiyaya para melahuac  
catli isihua tequipanojcahua catli más  
tlalnamiquij quilhuiyayaj.

Inijuanti quiilhuiyayaj:

**30** ‘Huelis miyac tlamantli mocuilijque quema tlat-  
lanque,

huan ama nochí moajachihuíaj.

Huelis sesen soldado quitocaros se o ome ich-  
pocame huan Sísara quitocaros nopa yoy-  
omitl catli más yejyectzi ica miyac colores.

Huelis nechhualiquilis miyac tlamantli catli  
yejyectzi tlajtzontli.

Huan catli más yejyectzi tlajjilpili mocahuas para  
moquechcostis iquechtla ya.’

**31** TOTECO, nochí mocualancaitacahua ma  
miquica,

pero masehualme catli mitzhueyichihuaj ma elica  
quej nopa tonati quema quisa ica noch  
ichicahualis.”

Quej nopa huicayayaj Débora ihuaya Barac.

Huan teipa nopa israelitame quipixque tlase-  
huilistli ipan nopa tlali para 40 xihuitl.

## 6

### *TOTECO quinotzqui Gedeón ma quinyacana is- raelitame*

<sup>1</sup> Huan nopa israelitame sempa quichijque catli  
amo cuali iixpa TOTECO, huan yaya quintemactili  
ininmaco nopa madianitame. Huan nopa  
madianitame quintlaijiyohuiltijque chicahuac  
para chicome xihuitl, <sup>2</sup> huan tlahuel fiero  
quinchihuilijque israelitame. Yeca por catli nopa  
madianitame quinchihuiliyayaj, nopa israelitame  
motlatitoj ipan tecacahuatl, huan campa tlaostoco  
huan nopona mocajque para itztose campa  
cuatitlamitl ipan tepeme. <sup>3</sup> Huan quema  
nopa israelitame tlatojtocayayaj ipan ininmil,  
nopa madianitame, huan amalecitame huan  
sequinoc xinachtli masehualme catli hualayayaj  
campa hualquisa tonati quitlamiltijque noch  
catli quitoctoyaj. <sup>4</sup> Nochi quisosolojque  
ipan ininmil israelitame hasta altepetl  
Gaza. Huan amo tleno quincahuilijque para  
nopa israelitame ma quicuaca. Nojquiya  
quincuilijque israelitame noch ininborregojhua,  
ininhuacaxhua huan ininburrojhua. <sup>5</sup> Pampa  
ajsiyayaj nelia miyac nopa seyoc tlali ehuani  
ipan inincamellos hasta amo aqui hueliyaya  
quinpohua. Huan quinhualicayayaj noch

inintlapiyalhua catli itztoyaj quen chapolime catli nochí quitlamiltíaj. Huan quiquetzayabaj ininchajchaj tlen yoyomitl nopona huan mocahuayabaj hasta nochí quitlamiltisquíaj, huan nopa tlali mocajqui huactoc. <sup>6</sup> Huan quej nopa, nopa israelitame mocajque pilteicneltzitzí por nopa madianitame huan huajca quitzajtzilijque TOTECO. <sup>7</sup> Huan quema nopa israelitame quitlajtlanijque TOTECO ma quinmanahui tlen nopa madianitame, <sup>8</sup> TOTECO quintitlanili se tlajtol pannextijquetl huan yaya quinilhui nopa camanali catli TOTECO toDIOS tiisraelitame quimacac. TOTECO quijto: “Na nimechquixti ipan tlali Egipto campa anitztoyaj anilpitoque huan antequipanohuayabaj san tlaptic. <sup>9</sup> Nimechmanahui ininmaco egiptome huan ininmaco nochí sequinoc catli amechcualancaitayabaj. Amoixtla niquitojtocac huan nimechmactili inintlal. <sup>10</sup> Huan nimechilhui para na niamotECO Dios huan para amo xiquinhueyichihuaca nopa tlaixcopincayome catli nopa amorreos nopona quintlepanitaj, pero amo antechtlacaquilijque.”

### *Itequihua Toteco quinojnotzaco Gedeón*

<sup>11</sup> Teipa se tonal hualajqui itequihua TOTECO huan mosehui ahuatziňla catli eltoc nechca altepetl Ofra catli eliyaya iaxca Joás iixhui Abiezer. Huan Gedeón, icone Joás, quiichtacatejtzonayaya trigo campa tlacoyonijtoya huejcatla ipan tetl para nopona quipatzcasquía xocomecatl para quiquixtilis iayo. Quej nopa, amo nesiyaya pampa

amo quinequiyaya nopa madianitame ma quiitaca huan mocuilise nopa trigo.

<sup>12</sup> Huan itequihua TOTECO monexti iixpa Gedeón huan quiilhui:

—TOTECO mohuaya itztoc huan tielis se soldado catli tlahuvel motemacas ipan tlahuilancayotl.

<sup>13</sup> Huan Gedeón quitlatzintoquili:

—Sintla TOTECO itztoc tohuaya, huajca ¿para tlen topanti nochí ni tlamantli catli ohui? ¿Para tlen amo techchihuilía nopa tetzatl catli tohuejapan tatahua quiijtoque quinchihuili quema quinquixti ipan tlali Egipio? Ama eltoc quen TOTECO techtlahuelcajtoc huan techtemactilijtoc ininmaco nopa madianitame.

<sup>14</sup> Huan TOTECO quitlachili huan quiilhui:

—Na nimitzmacas nochicahualis. Xiya ta, xiquinmanahuiti israelitame ininmaco nopa madianitame pampa ama na nimitztitlani.

<sup>15</sup> Pero Gedeón sempa quinanquili:

—¿Ay noTeco, quenicatza huelis niquinmanahuis israelitame? Nihuala ipan nopa familia catli más teicneltzi ipan nochí iixhuihua Manasés. Huan ipan noteiximatcahua nieli catli más nitiquitetzi.

<sup>16</sup> Huan TOTECO quinanquili:

—Naya mohuaya niitztoc huan tiquintlanis nopa madianitame quen elisquía san se tlacatl.

<sup>17</sup> Huan Gedeón sempa quiilhui TOTECO:

—Sintla techtlapejpenijtoc huan techcualita, huajca xijchihua se tlanextilijcayotl para nelía njmatis tiitztoc TOTECO catli techcamanalhuía.

<sup>18</sup> Se favor nimitztlajtlanía, amo xiquisa hasta

nimocuepas huan nimitzhualiquilis se nemactli catli nijnequi nimitzmacas.

Huan TOTECO quinanquili:

—Nica nimitzchiyas hasta sempa tihualas.

<sup>19</sup> Huajca Gedeón yajqui quicuallalito se pilchivojtzí ihuaya 20 litros harina huan quichijqui pantzi catli amo quipiya tlasonejcayotl. Teipa quitlali nopa nacatl ipan se chiquihuitl huan nopa nacatl iayo ipan se hueyi comitl. Huan quihuicac nochí para quimacas campa itztoya itequihua Toteco ahuatzintla.

<sup>20</sup> Huajca itequihua Toteco Dios quiilhui: “Xijhualica nopa nacatl huan nopa pantzi catli amo quipiya tlasonejcayotl huan xijtlali ipan ni tetl huan ipani nopa nacatl xijtoyahua iayo.”

Huan Gedeón quej nopa quichijqui. <sup>21</sup> Huan nopa itequihua TOTECO quiajsic nopa nacatl huan nopa pantzi catli amo quipiya tlasonejcayotl ica icuatopil. Huan tlen nopa tetl quisqui tlilt catli quitlati nopa nacatl ihuaya nopa pantzi para quinextis TOTECO quiseli itlacajcahuialis. Huan nopa tequihua san polijqui iixtla.

<sup>22</sup> Huajca Gedeón momacac cuenta para eliyaya itequihua TOTECO huan quiijto:

—¡Ay TOTECO Catli Más Tijpiya Tlanahuatili! Niquitztoc ixayac motequihua.

<sup>23</sup> Pero TOTECO quiilhui:

—Ximoyoltlali huan amo ximajmahui pampa amo timiquis.

<sup>24</sup> Huajca nopona Gedeón quiquetzqui se tlaixpamitl para quielnamiquis TOTECO huan quitocaxti “TOTECO, Yaya Catli Temaca Yoltlasehuilistli”. Huan ni tlaixpamitl noja eltoc

hasta ama nepa Ofra campa itztoque iixhuihua Abiezer. <sup>25</sup> Huan nopa yohuali TOTECO quiilhui Gedeón:

—Xijcui nopa toro catli ompa ejquetl catli motata iaxca huan catli quipiya chicome xihuitl. Huan xijtlahuiso nopa tlaixpamitl tlen Baal catli motata quipixtoc. Huan xijtzontequi nopa tlaixcopincayotl Asera catli quiquetztoc ielchiquitipa ne seyoc. <sup>26</sup> Huan xijchihua se tlaixpamitl para TOTECO Dios itzonatipa nopa tepetl huan xijsencahua nopa teme ica tlamocuitlahuili quen monequi. Huan xijcui nopa toro catli ompa tlacatquetl, huan xijmicti huan techmaca quen se tlacajcahualistli. Huan xijtequihui nopa cuahuitl tlen nopa tlaixcopincayotl Asera catli tijtzojtzontejqui para xijtlati ipan nopa tlaixpamitl.

### *Gedeón quichijqui catli Toteco quiilhui*

<sup>27</sup> Huajca Gedeón quincuic majtlactli itequipanojcahua huan quichijqui quen TOTECO quinahuati. Pero majmajqui para quisencahuas tonaya pampa moilhuiyaya quiitasquíaj iteiximatcahua huan catli ehuaj nopa altepetl. Huajca quisencajqui ica tlayohua.

<sup>28</sup> Huan ica ijnaloc mejque tlacame catli ehuaj nopa altepetl huan quiitaque para sosolijtoya nopa tlaixpamitl tlen Baal. Nojquiya quiitaque para se quitzontectoya nopa itlaixcopincayo Asera catli quichijtoyaj ica cuahuitl. Huan nojquiya quiitaque nopa tlaixpamitl huan ipan quitencajtoya nopa toro.

<sup>29</sup> Huajca motlatzintoquilijque se ica seyoc: “Ajqueya quichijqui ni tlamatli?”

Pero teipa quimatque para quichijtoya Gedeón, icone Joás. Huajca yajque huan quiilhuitoj Joás:

<sup>30</sup> —Xijquixti motelpoca para tijmictise pampa quisemanqui itlaixpa Baal huan quitzoztzontejqui itlaixcopincayo Asera catli tijchijtoyaj ipan tlaquetzali.

<sup>31</sup> Huan Joás quinnanquili nochí inijuanti catli moquetztoyaj inechca ica ni camanali:

—¿Para tlen anquinequij anquimanahuise Baal huan antlahuilanase por ya? ¿Anmoilhuíaj Baal amo hueli momanahuis ica iseltzi? Nelía anhuihuitique para anquijtose amo hueli momanahuis Baal. Ma miqui nimantzi catli ya nopamoilhuía. Sintla Baal nelía eli se dios, huajca ma momanahui iseltzi huan ma quinhuilana catli quisosolojque itlaixpa.

<sup>32</sup> Huajca ipan nopa tonal pejque quitocaxtíaj Gedeón, Jerobaal. Jerobaal quijtosnequi “ma momanahui Baal iseltzi”. Quej nopa quitocaxtijque pampa quisosolojtoya itlaixpa Baal.

<sup>33</sup> Teipa mosentilijque nochí madianitame, huan amalecitame, huan sequinoc xinachtli tlacame catli hualajque campa hualquisa tonati huan quipanoque hueyatl Jordán huan mochijque campa nopa tlamayamitl Jezreel. <sup>34</sup> Huan Itonal TOTÉCO motlali ipan Gedeón huan Gedeón quipitzqui nopa cuacuajtli para nochí iixhuihua Abiezer ma mosentilica ihuaya. <sup>35</sup> Nojquiya quinnahuati tlayolmelahuani ma yaca ipan nochí nopa tlali campa itztoyaj iixhuihua Manasés para ma mosansejcotilica ihuaya. Nojquiya tlatitlanqui ma quinyolmelahuatij israelitame ipan nopa huejhueyi familias Aser, Zabulón huan

Neftalí. Huan nochí injuanti nima hualajque mosansejcotilicojihuaya Gedeón.

<sup>36</sup> Huan Gedeón quiilhui Toteco Dios: “Sintla nelía techtequihuis para ma niquinmanahui israelitame quen tiquijtohua, <sup>37</sup> quej ni technextili. Nica campa quitejtejtzonaj trigo nijtlalis se ipochquiyo borrego. Sintla ica ijnaloc xolontos san ipochquiyo nopa borrego ica ajhuachtli huan nopa tlali mocahuas huactoc, huajca nijmachilis para techtequihuis para niquinmanahuis israelitame quen techilhuijtoc.”

<sup>38</sup> Huan quej nopa panoc. Quema mejqui ica ijnaloc quipatzcac ipochquiyo nopa borrego huan quisqui atl hasta temic se hueyi caxitl ica ajhuachtli.

<sup>39</sup> Pero noja Gedeón sempa quiilhui Toteco Dios: “Amo xicualani sintla nijmitztlajtlanis seyoc tlamantli tlanextilijcayotl para temachtli nijmatis sintla melahuac. Ama nimitztlajtlanía para ma mocahua huactoc nopa ipochquiyo borrego huan nopa tlali catli quiyahualohua ma xolontos ica ajhuachtli.”

<sup>40</sup> Huan quej nopa quichijqui Toteco Dios nopa yohuali. Mocajqui huactoc nopa ipochquiyo borrego huan nochí nopa tlali xolontoya ica ajhuachtli.

## 7

### *Gedeón quintlanqui nopa madianitame*

<sup>1</sup> Huajca Gedeón catli nojquiya itoca Jerobaal huan nochí catli ihuaya itztoyaj mejque cualca, huan yajque mochihuatoj nechca nopa ameli

Harod. Huan nopa madianitame mochijtoyaj ica huejcapa campa nopa tlamayamitl iicxitla nopa tlachiquili catli itoca More.

<sup>2</sup> Huan TOTECO quiilhui Gedeón: “Nopa tlacame catli tiquinhualica neltlahuel miyaqui. Huajca amo huelis nimechpalehuis para anquitlanise nopa madianitame. Pampa huelis anmohueyimatise huan ammoilhuese amoseltzitzi amomanahuijque. <sup>3</sup> Huajca ama xiquinyolmelahua nochi nopa tlacame sintla se acajya huihuipica o majmahui, ma quisa tlen ni tepetl Galaad huan ma yohui ichaj.”

Huajca quisque 22 mil tlacame para yase ininchaj huan san mocajque 10 mil.

<sup>4</sup> Huan TOTECO quiilhui Gedeón: “Noja mocahuaj tlahuel miyaqui mosoldados. Ama xiquinhuica ma atliti huan nopona niquinyejyecos huan nimitznextilis ajqueya yas mohuaya huan ajqueya amo yas. Huan quema nimitzilhuis para se yas mohuaya, yaya yas. Huan quema nimitzilhuis se amo yas, huajca amo yas.”

<sup>5</sup> Huajca Gedeón quinhuicac nochi campa atl para ma atlaca huan TOTECO quiilhui Gedeón: “Xiquiniyocatlali nopa tlacame ica ome pamitl: Inijuanti catli quitlananaj nopa atl ipan ininmax para quipipitzose quen chichime huan inijuanti catli motlancuaquetzase para atlise ipan nopa hueyatl.”

<sup>6</sup> Huan san 300 tlacame quipipitzojque atl ica ininmax quen chichime. Huan nochi nopa sequinoc san motlancuaquetzque huan atlique.

*Nopa 300 isoldados Gedeón catli TOTECO quintlapejpeni*

<sup>7</sup> Huajca TOTECO quiilhui Gedeón: “Na niquintlanis nopa madianitame ica ni 300 tlacame catli san quipipitzojque atl. Xiquintitlani nopa sequinoc sempa ma yaca ininchajchaj.”

<sup>8</sup> Huajca Gedeón quinsentili nochí nopa soqui xarros huan oquich borreojme inincuacua catli quihualicayayaj ne sequinoc tlacame huan quintilanqui ma yaca ininchajchaj. Huan san mocajque ihuaya nopa 300 tlacame catli tlapetlapenilme. Huan nopa madianitame mochijtoyaj tlatzintla campa tlamayamitl. <sup>9</sup> Huan nopa yohuali TOTECO quiilhui Gedeón: “Ximehua huan xitemo ica mosoldados campa nopa madianitame mochijtoque, pampa na nimitzmacatoc momaco huan nijchihuas xiquintlani. <sup>10</sup> Pero sintla timajmahui para tiquinhuilanati, huajca achitihuixitemo nepa ihuaya motequipanojca Fura. <sup>11</sup> Huan xijtacacuilitij tlaque moilhuíaj nopa madianitame. Huan huajca tijpiyas más chicahualistli huan tijnequis titemos ica mosoldados para tiquinhuilanati campa mochijtoque.”

Huajca Gedeón ichtaca yajqui ihuaya itequipanojca Fura hasta iteno campa mochijtoyaj nopa madianita soldados. <sup>12</sup> Huan nopona itztoyaj nochí nopa madianitame, amalecitame huan nopa tlacame catli hualajque ica campa hualquisa tonati. Tlahuel miyaqui itztoyaj huan nesiyayaj san quen tlahuel miyaqui chapolime. Quinpiyayayaj miyac camellos hasta amo aqui hueliyaya quinpohua. Elque quen imiyaca xali iteno hueyatl. <sup>13</sup> Huan ipan

nopa tlatoctzi quema ajsito Gedeón, quicajqui para se tlacatl quipohuiliyaya ihuampox catli quitemictoya huan quej ni quiilhuiyaya:

—Ipan se temictli niquitac catli eliyaya quen se pantzi catli momimilojtihualajqui huan ajsico nica campa timochijtoque. Huan quitejtzonaco chicahuac se hueyi yoyon cali huan nopa yoyon cali huetzqui.

<sup>14</sup> Huan ihuampox quiilhui:

—Catli tijtemijqui quiijtosnequi para nopa israelita Gedeón, icono Joás, hualas ica nochí ichicahualis huan Toteco Dios quimactilis imaco nochí timadianitame huan nochí catli itztoque tohuaya. Huan yaya techtlamimictis.

<sup>15</sup> Huan quema Gedeón quicajqui nopa temictli huan tlaque quinequi quiijtos, quihueyichijqui Toteco. Huan teipa sempa mocuepqui campa nopa israelitame mochijtoyaj huan quinilhui:

—Ximotlananaca pampa Toteco techmacatoc nopa madianitame tomaco para ma tiqintlanise.

<sup>16</sup> Huan quinxelo nopa 300 tlacame huan quintlali ica eyi pamitl huan sesen tlacatl quimacac se icuacua huan se soqui xarro catli iijtic quipixtoya tlilelemectli. <sup>17</sup> Huan quinilhui:

—Quema niajsiti campa mochijtoque, xijtlachilica catli nijchihuas huan nochí amojuanti nojquiya ya nopa xijchihuaca.

<sup>18</sup> Quema na huan catli nohuaya yohuij tijpitzase nopa oquich borregojme inincuacua, nojquiya xijpitzaca yahualtic campa mochijtoque, huan nojquiya xitzajtzica chicahuac huan xiquijtoca: ‘Tihualahuij ica ichicahualis TOTECO huan ica Gedeón.’

<sup>19</sup> Huan quej nopa Gedeón ihuaya nopa 100 tlacame catli ihuaya yohuiyayaj ajsitoj nechca campa nopa madianitame mochijtoyaj. Huan eliyaya tlajco yohual quema mopatlayayaj inintlamocuitlahuijcahua. Huan nopa 100 tlacame nimantzi pejque tlapitzaj huan quitlapanque nopa soqui xarros catli ipan quihiucayayaj nopa tlidelemectli. Huan ne sequinoc san se quichijque. <sup>20</sup> Huan nopa eyi pamitl tlen soldados quipitzque inincuacua borregojme huan quitlapanque nopa soqui xarros. Huan quihiucayayaj nopa tlidelemectli ica iniopoch huan ica ininnejmac quiitzquitiyohuiyayaj nopa cuacuajtli para huelise quipitzase. Huan tlahuejchijtiyohuiyayaj: “Tihualahuij ica ichicahualis TOTECO huan ica Gedeón.”

<sup>21</sup> Huan sesen tlacatl san moquetzqui nopona yahaultic campa mochijtoyaj nopa madianitame. Huajca nochí nopa madianita soldados pejque motlalohuaj huan tzajtzitiyajque cholojque. <sup>22</sup> Huan quema nopa 300 tlacame quipitztoyaj nopa cuacuajtli, TOTECO quichijqui para nopa madianitame ma mohuilanaca huan ma momictica campa hueli campa mochijtoyaj. Huan catli mocajque yoltoque cholojque hasta altepetl Bet Sita catli mocahua ipan ojtli para altepetl Zerera. Nojquiya cholojtejque hasta inepa altepetl Abel Mehola nechca Tabat.

<sup>23</sup> Huan teipa Gedeón quinnotzqui ma mosentilica nochí israelita soldados catli iixhuihua Nefatalí, Aser huan Manasés huan quintoquiliyajque nopa madianitame. <sup>24</sup> Nojquiya Gedeón

quintitlanqui tlayolmelahuani para ma quinymolmelahuatij nochí tlacame catli iixhuihua Efraín huan quinilhui: “Xitemoca nimantzi huan xiquinhuilanaquij. Xijtzacuatij campa quiixcotonaj hueyatl Jordán nechca Bet Bara para amo panose nopa madianitame.”

Huajca nochí iixhuihua Efraín hualajque huan quichijque catli quinilhuijtoya. Huan quipixque nochí nopa atemitl ininmaco hasta altepetl Bet Bara. <sup>25</sup> Huan quinitzquijque nopa ome tlayacanani tlen madianitame catli inintoca Oreb huan Zeeb. Huan Oreb quimictijque campa nopa tetl catli ama itoca Oreb. Huan Zeeb quimictijque campa quicoyonijtoyaj para quipatzcase xocomecatl huan campa ama itoca Zeeb. Huan teipa quema ya quintojtocatoyaj nopa madianitame, quihualiquilijque Gedeón inintzonteco Oreb huan Zeeb hasta ne seyoc nali hueyatl Jordán.

## 8

### *Gedeón quinitzqui tlanahuatiani tlen madianitame*

<sup>1</sup> Pero teipa nopa soldados ipan nopa hueyi familia Efraín cualanque ihuaya Gedeón huan pejque mocamaijixnamiquij ihuaya. Huan quitlatzintoquilijque para tlen amo quinnnotztejqui quema achtihui yajqui quinhuilanato nopa madianitame.

<sup>2</sup> Huan Gedeón quinnanquili:

—¿Amo anquiitaj para nopa quentzi catli aniihxuihua Efraín anquichijque eltoc más hueyi que

nochi catli tojuanti catli tiixhuihua Abiezer tijchijque? <sup>3</sup> Toteco Dios anmechmactili amomaco Oreb huan Zeeb nopa ome tlanahuatiani tlen madianitame. Amo tleno nijchijtoc na catli ipati quen catli anquichijtoque.

Huan quema iixhuihua Efraín quicajque catli quiijto Gedeón, ayacmo cualanque ihuaya. <sup>4</sup> Huan Gedeón ihuaya nopa 300 tlacame ajsitoj Jordán huan quiixcotonque masque nelsiyajtoyaj pampa quintojtocatiyohuiyaya inincualancaitacahua. <sup>5</sup> Huan Gedeón quintlajtlani nopa tlacame tlen Sucot:

—Nimechtlajtlanía xiquintlamacaca catli nohuaya hualahuij, pampa tlahuel siyajtoque huan mayanaj. Huan na niquntojtocatiyas Zeba huan Salmuna, nopa tlanahuatiani tlen madianitame.

<sup>6</sup> Huan nopa tlayacanani ipan altepetl Sucot quej ni tlananquilijque:

—Ayamo anquinitzquíaj Zeba huan Zalmuna, huajca amo hueli tiquintlamacase mosoldados. Pampa sintla amo anquinitzquise huan timechtlamacase, inijuanti hualase huan techtlatzacuiltise.

<sup>7</sup> Huan Gedeón quiijto:

—Quema TOTECO ya quintemactilijtos nomaco Zeba huan Zalmuna, sempa nihualas nica huan nijhuejhueloqui amonacayo ica huitzli huan ica huitzpoli catli onca ipan huactoc tlali.

<sup>8</sup> Huan teipa Gedeón tlejcoc campa altepetl Peniel huan nojquiya quintlajtlani ma quintlamacaca isoldados. Huan nopa Peniel ehuani tlananquilijque san se quej nopa Sucot ehuani.

<sup>9</sup> Huajca Gedeón nojquiya quinilhui nopa Peniel ehuani:

—Quema ya niquintlantos, sempa nihualias nica huan nijtlahuisoqui ni huejcapantic tepancali campa antlamocuitlahuáj.

<sup>10</sup> Huan nopa tlanahuatiani Zeba huan Zalmuna itztoyaj ipan tlali Carcor huan ininhuaya itztoyaj quen 15 mil ininsoldados. San inijuanti mocahuayayaj tlen nochí nopa soldados catli hualayayaj ica campa hualquisa tonati, pampa Gedeón huan isoldados ya quinmictijtoyaj 120 mil soldados. <sup>11</sup> Huajca Gedeón huan isoldados tlejcoque ipan nopa ojtli catli onpano campa itoca Noba huan Jogbeha para campa hualquisa tonati. Huan quej nopa ajsitoj campa mochijtoyaj nopa soldados huan quinhuilanatoj quema inijuanti amo quinchiyayayaj. <sup>12</sup> Huan tlanahuatiani Zeba huan Zalmuna, nopa ome tlanahuatiani tlen tlali Madián, cholojque. Pero Gedeón huan isoldados quintepotztocatiyajque huan quinitzquiique huan quinmajmatijque nochí ininsoldados. <sup>13</sup> Teipa Gedeón, icone Joás, mocuepqui tlen campa tlahuilanatoj ipan nopa ojtli catli itoca eliyaya Heres. <sup>14</sup> Huan quiitzqui se telpocatl tlen altepetl Sucot huan quitlatzintoquili inintoca nopa tlayacanani huan huehue tlacame ipan nopa altepetl. Huan nopa telpocatl quiijcuilo 77 inintoca.

<sup>15</sup> Huajca Gedeón yajqui ipan altepetl Sucot huan mocamanalhui ininhuaya nopa tlacame huan quinilhui:

—¿Anquielnamiquij quenicatza annocapajque pampa ayamo niquinitzquijtoya Zeba huan Zalmuna? ¿Anquielnamiquij para amo anquinejque anquinmacase pantzi nosoldados catli

nelsiyajtoyaj, pampa ayamo tiquinitzquijtoyaj Zeba huan Zalmuna? ¡Cualtitoc! Nica itztoque.

<sup>16</sup> Huajca Gedeón quinitzqui nopa tlawayacanani huan huehue tlacame tlen altepetl Sucot huan quicuic huitztl huan cuame catli huitzpoltic catli onca ipan nopa huactoc tlali huan ica ya nopa quinhuitejqui huan quintlaijiyohuilty. <sup>17</sup> Huan nojquiya ipan altepetl Peniel quitlahuiso nopa huejcapantic tepancali catli ijcatoya nopona huan quintlamimicti nopa tlacame catli nopona itztoyaj.

<sup>18</sup> Teipa Gedeón quintlatzintoquili nopa tlanahuatiani Zeba huan Zalmuna:

—¿Quenicatza intatlachiyalis nesiyaya nopa tlacame catli anquinmictijque ipan nopa altepetl Tabor?

Huan tlananquilijque:

—Inijuanti nesiyayaj quen ta. Sesen nesiyaya quen se tlanahuatijquetl icone.

<sup>19</sup> Huan Gedeón quijto:

—Eliyayaj noicnihua, inijuanti catli nonana iconehua. Nijtestigojquetza TOTECO catli itztoc, sintla amo anquinmictijtosquíaj, na nojquiya amo nimechmictisquía ama.

<sup>20</sup> Huan quinahuati se iachtihui cone catli itoca Jeter:

—Ximotlanana huan xiquinmicti.

Pero Jeter noja eliyaya se cone tlacatl huan majmajqui, huan amo motemamac quinmictis.

<sup>21</sup> Huajca Zeba huan Zalmuna quiilhuijque Gedeón:

—Ta ximotlanana huan techmicti pampa se tlacatl quipiya itequi para mosemacas temictis.

Huan Gedeón moquetzqui huan quinmicti Zeba huan Zalmuna, huan quincuili ininquechyejca incamellos catli quinexti para eli se tlanahuati-quetl.

<sup>22</sup> Huan teipa nopa israelitame quiilhuijque Gedeón:

—Pampa ta techmanahuijtoc ica nopa madianitame, ama tijnequij para ta techyacanas. Xieli titotlanahuatijsca, ta, mocone huan moixhuihua.

<sup>23</sup> Pero Gedeón quinnanquili:

—Na amo nielis niamotlanahuatijsca, niyon nocone amo anmechyacanas. Yaya catli anmechyacanas elis TOTECO. Yaya elis amotlanahuatijsca. <sup>24</sup> San quena, nijnequi nimechtajtlanis para sese amojuanti techmacaca se anillo catli anquincuilijque amocualancaitacahua. (Pampa inijuanti catli tiquintlanque eliyayaj iixhuihua Ismael huan momajtoyaj quitequihuíaj anillos ipan ininyacatzol huan ipan ininnacas.)

<sup>25</sup> Huan inijuanti tlananquilijque:

—Nochi timitzmacase ica cuali.

Huan quipatlajque se yoyomitl huan sese inijuanti quitlalijque se anillo nopona. <sup>26</sup> Huan ietica nochi nopa anillos tlen oro elqui quen 19 kilos. Huan iyoca quihualicaque sequinoc tlamantli tlen oro catli moquechcostiyayaj, huan yoyomitl catli morado quen catli motlaliliyayaj nopa tlanahuatiiani tlen tlali Madián. Huan amo quipojque ininquechcoshui nopa camellos. <sup>27</sup> Pero ica nochi nopa oro Gedeón quisencajqui se yolixpantzajcayotl huan quicahuato ipan ialtepe Ofra. Huan teipa nochi israelitame quitlahuelcajque Toteco huan quihueytلالijque nopa yolixpantzajcayotl

catli Gedeón quichijqui. Huajca catli quichijqui Gedeón quinmasilti ya ihuaya ifamilia ipan tlajtacoli.

<sup>28</sup> Huajca quej nopa, nopa israelitame quintlanque nopa madianitame huan ayacmo quema huelque motlananaj sempa. Huan ipan tlali Israel oncac tlasehuilistli para 40 xihuitl quema noja itztoya Gedeón.

*Mijqui Gedeón catli tlayacanqui ipan tlali Israel*

<sup>29</sup> Huan quema tlantoya tlahuilana Gedeón, catli nojquiya quitocaxtiyayaj Jerobaal huan catli eliyaya icone Joás, yaya yajqui itztotí ipan ichaj ipan itlal. <sup>30</sup> Huan Gedeón quinpixqui 70 itelpocahua, pampa quinpixqui miyac sihuame. <sup>31</sup> Nojquiya quipixtoya se iompaca sihua ipan altepetl Siquem huan nojquiya quipixqui se icone ihuaya huan quitocaxtlali Abimelec. <sup>32</sup> Huan quema Gedeón mijqui ya eltoya nelhuehuentzi huan quitojque nechca itata ipan se tecacahuatl nechca altepetl Ofra ipan nopa tlali catli iniaxca iixhuihua Abiezer.

<sup>33</sup> Huan quema ya mictoya Gedeón, nopa israelitame sempa quicajtejque Toteco huan pejque quinhueyichihuaj nopa tlaixcopincayome catli itoca baales. Huan quitlapejpenijque Baal Berit para elis inindios. <sup>34</sup> Huan nopa israelitame ayacmo quielnamijque TOTECO Dios catli quinmanahuijtoya ininmaco inincualancaitacahua. <sup>35</sup> Nyon amo quimacaque tlatlepanitacayotl iixhuihua Gedeón (o Jerobaal) por nochí catli cuali quinchihuilijtoya israelitame.

## 9

*Abimelec quinmicti iicnihua para huelis tlanahuatis*

<sup>1</sup> Se tonal Abimelec catli eliyaya se itelpoca Gedeón (o Jerobaal) huan moscalti ipan altepetl Siquem sempa yajqui ialtepe para quinpaxalotl iicnihua inana. Huan quincamanalhui nochí catli itztoyaj ipan ichaj ihueyi tata huan quinilhui:

<sup>2</sup> —Xiyaca huan xiquincamanalhuitij nopa tlayacanani ipan ni altepetl. Xiquintlatzinto-quilica sintla quinequij ma quinyacanaca nopa 70 tlanahuatiani, nopa sequinoc itelpocahua Gedeón, o sintla quinequij san na ma niquinyacana. Xiquelnamiquica para niicone Gedeón catli niehua nica huan yeca san se tonacayo huan toeso.

<sup>3</sup> Huan itiojhua Abimelec yajque quincamanalhuitoj inijuanti catli nopona ehuani huan quinilhuique catli Abimelec quijito. Huan nopa Siquem ehuani motemacaque para quipalehuise Abimelec pampa ehuayaya nopona huan eliyaya quen ininteiximatca. <sup>4</sup> Huan quimacaque 70 plata tomi catli quicuitoyaj itiopa nopa teteyotl Baal Berit. Huan ica nopa tomi Abimelec quintlanejqui se-quin tlacame catli mosisiníaj huan san nejnemini huan inijuanti ihuaya yajque. <sup>5</sup> Huan yajque campa ichaj itata ipan altepetl Ofra huan ipan se hueyi tetl quintlamimictijque nochí 70 itepotz icnihua pampa eliyaya iconehua Gedeón. San mocajqui itztoc nopa teipa ejquetl, Jotam, pampa cholo huan motlatito. <sup>6</sup> Huajca nochí

catli ehuayayaj altepetl Siquem huan nopa tlacame catli tominpixque ipan Milo mosentilijque campa se ahua cuahuitl nechca nopa hueyi tetl catli moquetztoya ipan altepetl Siquem. Huan nopona ininseltzitzqui quitlalijque Abimelec para ma eli tlanahuatijquetl ipan tlali Israel.

<sup>7</sup> Quema Jotam quimatqui catli panoc, tlejcoc ipan nopa tepetl Gerizim huan nopona chicahuac tlahuejchijqui huan quinilhui:

“Techtlacaquilica anSiquem ehuani sintla anquinequij Toteco Dios ma anmechtiochihuas. Na nimechilhuis se huicalotl. <sup>8</sup> Se tonal nopa cuame quinejque quiipyase se inintlanahuatijca. Huan achtilhui yajque quiitatoj nopa cuahuitl catli temaca olivos para aceite huan quihuijque: ‘Xieli titotlanahuatijca.’ <sup>9</sup> Pero nopa olivo cuahuitl amo quinejqui huan quinnanquili: ‘Amo nijcahuas nitemacas noaceite catli quitequihuaj para quintiochihuaj tlacame huan nielis niamotlanahuatijca san pampa nijnequi nielis más nihueyi que sequinoc cuame.’

<sup>10</sup> “Huajca nopa cuame yajque quiitatoj nopa cuahuitl catli temaca nopa cuatlajcayotl higuera huan quihuijque: ‘Xieli titotlanahuatijca.’ <sup>11</sup> Huan nopa higuera cuahuitl tlananquili: ‘Amo huelis nijcahuas nitemacas notlajca catli tzopelic para niyas huan nielis más hueyi que sequinoc cuame.’

<sup>12</sup> “Teipa yajque quiitatoj nopa xocomeca tzontli huan quihuijque: ‘Xieli titotlanahuatijca.’

<sup>13</sup> Huan nopa xocomeca tzontli tlananquili: ‘Amo huelis nijcahuas nitemacas noxocomeca atl catli

quipactía Toteco Dios huan masehualme para nielis más hueyi que sequinoc cuame.'

<sup>14</sup> "Huajca teipa nochí nopa cuame quiilhuitoj nopa huitzcuahtitl: 'Xieli titotlanahuatijca.'

<sup>15</sup> Huan nopa huitzcuahtitl quinnanquili: 'Sintla nelía antechtlapejpenijtoque huan anquinequij antechtlalise ma nieli niamatlanahuatijca, huajca xihualaca huan ximoecahuilica notzala. Pero sintla amo, njchihuas para quisas se tlilt tlen campa na huan quitlatís nochí nopa tiocuame ipan tlali Líbano.' "

<sup>16</sup> Huajca Jotam quijito: "Ni huicalotl quinequi quijitos anquitemojtoque catli más fiero para amechyacanas. Huajca ximoilhuica ama sintla cuali anquichijtoque quema anquitlalijque Abimelec para amotlayacanca. ¿Anquijitaj anquichijtoque catli cuali ica mijcatzi Gedeón huan iixhuihua? ¿Anquichihuilijtoque catli quinamiqui por nochí nopa cuali tlamatli catli notata Gedeón amechchihuili quema itztoya?" <sup>17</sup> Xiquelnamiquica para notata tlahuilanqui huan ica quentzi miquisquía para amechmanahuis ininmaco nopa madianitame.

<sup>18</sup> Pero ama ammosisiníaj ica notata huan iteiximatcahua, huan anquinmictijque ipan se tetl nopa 70 iconehua. Huan ama ipan Siquem anquitequitlalijque Abimelec para amotlanahuatijca catli icone notata ica iompaca sihua. Huan san anquitlalijque pampa eliyaya se amoteiximatca. <sup>19</sup> Sintla anquichijtoque catli xitlahuac huan catli cuali ica Gedeón huan iteiximatcahua, huajca cuali xiitztoca ihuaya Abimelec huan nojquiya ma cuali itzto Abimelec

amohuaya. <sup>20</sup> Pero sintla amo anquichijtoque catli cuali ica Gedeón, huajca ma quisa tlitl tlen Abimelec huan ma anmechtlamimicti, huan ma quisa tlitl tlen amojuanti catli anehuani Siquem huan Milo para xijmictica Abimelec.”

<sup>21</sup> Huan quema Jotam tlanqui camanalti, cholo huan yajqui motlatito campa tlali Beer huan no-pona mocajqui para itztos pampa quiimacasiyaya itepotz icni, Abimelec.

### *Siquem moyolajcomanqui ica Abimelec*

<sup>22</sup> Huan quema tlantoya eyi xihuitl para Abimelec tlanahuatis ipan tlali Israel, <sup>23</sup> TOTECO Dios quititlanili se iajaca Amocualtlacatl catli tequitqui ipan ya huan ipan nopa tlacame catli ejque altepetl Siquem para ma mocualancaitaca. Huan nopa Siquem ehuani moyolajcomanque para ma ayacmo quitoquilica Abimelec. <sup>24</sup> Huan ica catli quiajsic, Toteco quicuepili Abimelec pampa quitojajqui inieso iicnihua quema quinmictijque nopa 70 itelpocahua Gedeón. Huan nopa Siquem ehuani nojquiya quiselijque inintlaxtlahuil pampa quipalehuijque. Huan quej ni panoc. <sup>25</sup> Nopa Siquem ehuani pejque quintlalíaj tlacame cuatitla para ma quiojchiyaca Abimelec. Huan quema quichiyayabaj, quintlachtequiliyabaj nochí catli nopona panoyabaj. Huan se quilhui Abimelec para quiojchiyayabaj.

<sup>26</sup> Huan ipan nopa tonali Gaal, icono Ebed, inihuaya iicnihua yajque mocahuatoj altepetl Siquem huan nima nochí quiiximatque huan ipan ya motemachijque. <sup>27</sup> Huan quema nopa Siquem ehuani quitequiyabaj itlajca xocomecatl huan

quimapatzcayaya para quichihuase xocomeca atl, ilhuichihuayayaj campa itiopa ininteteyohua. Huan quema tlahuel tlacuajtoyaj huan tlaitoyaj, nochi pejque quitelchihuaj Abimelec. <sup>28</sup> Huan Gaal quiijito: “¿Tlaque ipati Abimelec para tojuanti catli tiSiquem ehuani ma tijtequipanoca? Yaya san icone Gedeón. Nojquiya amo tleno ipati itequipanojca, Zebul, catli nica tlanahuatía. Más cuali ma tijtequipanoca Hamor tohuejcapan tata tiSiquem ehuani. Ma ayacmo tijtoquilica Abimelec. <sup>29</sup> Sintla na nielisquía niamotlanahuatija, njitojtocatosquía nima nopa Abimelec. Na niquilhuisquía ma huala ininhuaya isoldados para timohuilanase.”

<sup>30</sup> Huan quema Zebul, catli quipixqui tlanahutili ipan nopa altepetl Siquem, quicajqui catli quijtojtoya Gaal, nelía cuanqui. <sup>31</sup> Huan tlaichtacatitlanqui ma quiyolmelahuatij Abimelec ya ni: “Gaal ininhuaya iicnihua ajisitoque altepetl Siquem huan quintlajtolmaca Siquem ehuani para san sejco ma mitzhuilanacaj. <sup>32</sup> Huajca ama ximejtehua ni yohuali ihuaya mosoldados huan ximotlatitij cuatitla. <sup>33</sup> Huan ica ijnaloc cualca quema ayamo quisa tonati, xiquinhuilanaca catli ehuaj ni altepetl. Huan quema Gaal ininhuaya isoldados quisase para mohuilanase amohuaya, xijchihuili quen tiquita para cuali.”

<sup>34</sup> Huajca quema Abimelec quiseli nopa camanali, mejtejqui ininhuaya isoldados huan mochijque nahui pamitl. Huan hualajque huan quiyahualojque altepetl Siquem, huan quichixque. <sup>35</sup> Huan ica ijnaloc Gaal quisqui calteno itepa nopa altepetl huan moquetzqui

puertajteno, huan Abimelec ininhuaya nochí isoldados pejque quisaj tlen campa mochijtoyaj.  
**36** Huan quema Gaal quinitac nopa tlacame hualayaya, quiilhui Zebul catli quipixqui tlanahuatili nopona:

—Xitlachiya campa ne tepetl. Nopona temotihuahuij tlahuilanca tlacame.

Huan Zebul quinanquili:

—¡Amo! Ta tiquita ne tepeme iniecahuilo huan timoilhuía para tlacame.

**37** Pero Gaal sempa camanaltic huan quiijto:

—Xiquita temotihuahuij tlacame tlen nopona campa más huejcapa, huan nojquiya hualahuij se pamitl tlen soldados campa ne ahuayo campa tetonalitaj.

**38** Huan Zebul quinanquili Gaal huan quiilhui:

—Ama sempa xicamanalti huan xiquijto para amo tleno ipati Abimelec para elis totlanahuatija. Nopona itztoque isoldados catli amo tiquinpatiitayaya. Huajca ama xiquisa huan ximohuilana ininhuaya.

**39** Huan Gaal quinyacanqui nopa Siquem ehuani huan mohuilanatoj ihuaya Abimelec.

**40** Pero Abimelec quitojtocatihualajqui Gaal huan Gaal cholo. Huan Abimelec quintlanqui huan quincocojtihualajqui miyac soldados huan injuanti huetztihualajque hasta icuapuertajteno itepa nopa altepetl. **41** Huan teipa Abimelec mocajqui ipan altepetl Aruma. Huan Zebul catli quipixqui tlanahuatili ipan altepetl Siquem quiqxisti Gaal ipan nopa altepetl ihuaya iicnihua para ma ayacmo itztoca nopona.

**42** Huan ne seyoc tonal nopa Siquem ehuani yajque para sempa tlahuilanatij. Huan quema Abimelec quimatzqui, **43** quincuitejqui isoldados huan quichijqui eyi pamitl. Huan quintlali ipan se mili para ma ojchiyaca. Huan quema quiitaque nopa Siquem ehuani quisayaya j ipan inialtepe, quisque campa motlatijtoyaj huan pejque quinmictijaj. **44** Huan Abimelec ihuaya nopa pamitl tlen soldados catli ihuaya itztoyaj motlaloque hasta campa icuapuerta itepa nopa altepetl para amo calaquise sempa huan momanahuise ipan inialtepe. Huan ne seyoc ome pamitl yajque quinhuilanatoj nochi catli itztoyaj campa mili, huan quintlamimictijque. **45** Huan Abimelec semilhuitl quinhuilanqui nopa Siquem ehuani hasta quitlamisosolo nopa altepetl huan quintlamimicti nochi catli nopona itztoyaj. Huan quitenque istatl nopona para ma ayacmo tlaeli huan quicajqui tlatzitzicatoc.

**46** Quema quicajque catli panoyaya nopa tominpiyani catli itztoyaj ipan nopa hueyi torre nechca Siquem yajque momanahuitoj campa más calijtic ipan itiopa nopa teteyotl Baal Berit. **47** Huan quiyolmelahuatoj Abimelec para nochi nopa tlayacanca tlacame motlatijtoyaj ipan nopa tiopamitl. **48** Huajca Abimelec yajqui ipan tepetl Salmón campa nopa tiopamitl ica nochi isoldados catli ihuaya itztoyaj. Huan ica se hacha quitzontejqui imacuayo se cuahuitl, huan quitlananqui huan quiajcolpantlali. Huan quinnahuati isoldados nojquiya ya nopa ma quichihuaca nimantzi huan ma quitoquilica. **49** Sesen nopa tlacame nojquiya quitzontejque se imacuayo se cuahuitl huan ya-

jque ihuaya Abimelec hasta campa nopa huejcapantic templo tlen ne teteyotl. Huan nopona quimontonojque nopa cuahuitl huan teipa quitlimacaque. Huan quej ni mijque nochicatli motlatijtoyaj ipan nopa huejcapantic tepancali tlen nopa teteyotl nechca Siquem. Itztoyaj calijtic quen se mil tlacame huan sihuame.

<sup>50</sup> Teipa Abimelec yajqui altepetl Tebes huan quinhuilanato huan quintlanqui. <sup>51</sup> Huan tlatlajco nopa altepetl eltoya se huejcapantic tepancali para huejca tlachiyase. Nopona motlatijtoyaj nochicatli huan sihuame para momanahuise inihuaya inintlayacancahua. Quitzactoyaj cuali nochicatli huan tlejcotoyaj hasta itzonatipa nopa huejcapantic tepancali. <sup>52</sup> Huan Abimelec ajisco hasta campa icuapuerta nopa tepancali para quintlatis. <sup>53</sup> Pero se sihuatl quimajcajqui iteyo se molino huan quiajsic ipan itzonteco Abimelec huan quicuatzayanqui.

<sup>54</sup> Huan Abimelec nima quinotzqui itlapalehuijca huan quiilhui: “Xijquixti momachete huan techmicti para amo ma quiijtoca para se sihuatl nechmicti.”

Huan itlapalehuijca quisentlapalhuili huan nima mijqui. <sup>55</sup> Huan quema nopa israelitame quiitaque mictoc nopa Abimelec, sesentzitzi sempa yajque ininchaj. <sup>56</sup> Huajca quej nopa quitlaxtlahui Toteco Dios ica nochicatli amo cuali quichijtoya Abimelec pampa quiixpanoc itata huan quintlamimicti nochicatli nopa 70 itepotz icnihua. <sup>57</sup> Huan nojquiya Toteco Dios quincuepili nochicatli nopa Siquem ehuani pampa quipalehuijque quinmicti iicnihua. Huajca quej

nopa panoc para ma tlami nopa tlatelchihuali catli Jotam, icono Gedeón, ica quintelchijtoya.

## 10

### *Tola, nopa chicompajuez*

<sup>1</sup> Teipa quema ya mictoya Abimelec, motlananqui Tola para mochihuas juez huan para quinmanahuis israelitame. Huan Tola elqui icono Fúa huan iixhui Dodo huan hualajqui tlen nopa hueyi familia Isacar. Huan Tola itztoya ipan altepetl Samir campa nopa tepeme ipan inintlal iixhuihua Efraín. <sup>2</sup> Huan ya tlanahuati huan quintlajtolsencajqui israelitame para 23 xihuitl. Teipa mijqui huan quitojque ipan altepetl Samir.

### *Jair, nopa chicuexpajuez*

<sup>3</sup> Teipa tlanahuati Jair catli ehuayaya Galaad huan tlanahuati 22 xihuitl quen juez. <sup>4</sup> Huan nopa juez Jair quinpixqui 30 itelpocahua catli tlejcoyayaj ipan 30 burrojme, huan quipixtoyaj 30 altepeme catli iniaxcahua ipan tlali Galaad. Huan nopa altepeme hasta ama eltoc huan quintocaxtiaj “ialtepehua Jair”. <sup>5</sup> Huan mijqui Jair, huan quitojque ipan altepetl Camón.

### *Amonitame quintlaijiyohuilitijke israelitame*

<sup>6</sup> Pero nopa israelitame sempa quiixpanoque TOTECO huan pejque quinhueyichihuaj nopa teteyome catli inintoca Baal, Astarot huan sequinoc teteyome catli quinhueyichihuayayaj masehualme tlen tlali Siria, Sidón, Moab, Amón huan Filistea. Huan nopa israelitame quielcajque TOTECO huan ayacmo quihueyichijque. <sup>7</sup> Huan TOTECO nelía cuanqui ininhuaya huan

quintemactili ininmaco nopa filisteos huan amonitame. <sup>8</sup> Huan nopa filisteos huan amonitame tlahuel quintlaijiyohuiltijque huan quintejtzonque nopa israelitame. Huan para 18 xihuitl quej nopa ininpantic nochi nopa israelitame catli mochijtoyaj ipan seyoc nali hueyatl Jordán ica campa hualquisa tonati, ipan tlali Galaad campa inintlatl amorreos. <sup>9</sup> Huan teipa iniixhuihua nopa amonitame quipanoque hueyatl Jordán para nojquiya quinhuilanase iixhuihua Judá, Benjamín huan Efraín huan nelía quintlaijiyohuiltijque nopa israelitame. <sup>10</sup> Huajca nopa israelitame chicahuac quitzajtzilijque huan quitlajtlanijque TOTECO ma quinpalehui, quiilhuijque: “Toteco Dios, titlajtlacolchijtoque moca ta, pampa timitztlahuelcajque huan tiquinhueyichijque nochi nopa teteyome tlen Baal.”

<sup>11</sup> Huan TOTECO quej ni quinnanquili nopa israelitame: “¿Amo nimechmanahui quema anmechtlaifiyohuilitiyayaj nopa egiptome, amorreos, amonitame, huan filisteos? <sup>12</sup> Huan nojquiya quema nopa sidonios, amalecitame huan madianitame anmechtlaifiyohuilitijque, na nimechmanahui ininmaco. <sup>13</sup> Pero masque na nimechpalehuijtoc miyac, amojuanti antechtlahuelcajtoque huan anquinhueyichijtoque tlaixcopincayome. Yeca ama ayacmo nimechmanahuis. <sup>14</sup> Xiyaca huan xi quintlajtlanitij amotlaixcopincayohua catli an quintlapejpenijtoque. Inijuanti ma anmechmanahuica ama quema antlaijiyohuíaj.”

<sup>15</sup> Huan nopa israelitame quiilhuijque TOTECO:

“Hueyi titlajtlacolchijtoque mocha ta. Xijchihua ica tojuanti quen tiquita quinamiqui, pero timitzlajtlaníaj ica nochí toyolo, techmanahui ama.”

<sup>16</sup> Huan quinijcuinijque nochí nopa teteyome catli quinpixtoyaj huan quihueyichijque TOTECO. Huan Toteco motequipacho quema quinitac quenicatza tlaijiyohuiyayaj. <sup>17</sup> Huan ininsoldados nopa amonitame mosentilijtoyaj para quinhuilanase israelitame huan mochijtoyaj ipan tlali Galaad. Huan ininsoldados israelitame mosentilijque huan mochijque ipan altepetl Mizpa.

<sup>18</sup> Huan nopa tlayacanca tlacame ipan tlali Galaadmoilhuijque: “¿Ajqueya huelis techyacanas para tiquinhuilanase nopa amonitame? Yaya catli motlananas elis tojuez huan technahuatis nochí tiGalaad ehuani.”

## 11

### *Jefté, nopa chicnajpa juez*

<sup>1</sup> Jefté eliyaya se tlacatl tlen tlali Galaad catli tlahuel motemacayaya ipan tlahuilancayotl. Itata itoca eliyaya Galaad quen inintla itoca, pero inana elqui se ahuilnenca sihuatl. <sup>2</sup> Nopa tlacatl Galaad quinpixqui sequinoc ioquichpilhua ica catli inelsihua. Huan quema nopa telpocame moscaltijque, quitojtocaque Jefté huan quiilhuijque para amo tleno huelis quiselis tlen inintata pampa eliyaya iconse yoc sihuatl.

<sup>3</sup> Huajca Jefté quintlalcuhuijtejqui itepotz icnihua huan yajqui itztotí ipan tlali Tob. Huan noppa momatqui ininhuaya tlacame catli mosiníaj huan Jefté quinyacanayaya para ojchiyase

huan tlachtequise. <sup>4</sup> Huan ipan nopa tonali nopa amonitame pejque quinhuilanaj israelitame. <sup>5</sup> Huajca nopa israelitame catli tlayacanayabaj ipan tlali Galaad yajque quinotzatoj Jefté ipan itlal Tob, <sup>6</sup> huan quiilhuijque:

—Xihuala tohuaya huan tielis titotlayacanca, huan tiquinhuilanase nopa amonitame.

<sup>7</sup> Huan Jefté quinnanquili nopa huehue tlacame tlen tlali Galaad:

—¿Para tlen antechtemohuaj ama quema antlaijiyohuíaj? Nelía antechcualancaitaj huan hasta antechquixtijque ipan ichaj notata.

<sup>8</sup> Huan nopa huehue tlacame tlen tlali Galaad quinanquilijque Jefté:

—Monequi techpalehuis huan yeca tihuahuij timitzitaquij. Xihuala tohuaya huan san sejco ma tiquinhuilanacaj amonitame huan ta technahuatis nochí catli tiehuani tlali Galaad.

<sup>9</sup> Huajca Jefté sempa quintlatzintoquili nopa tlayacanca tlacame tlen tlali Galaad:

—¿Sintla nimocuepas amohuaya huan san sejco tiquinhuilanase nopa amonitame huan sintla TOTECO quichihuas para ma huetzica nomaco, nelía temachtli nielis niamotlayacanca?

<sup>10</sup> Huan nopa huehue tlacame tlen tlali Galaad quinanquilijque Jefté:

—Tijtestigojquetzaj TOTECO para quen nopa elis.

<sup>11</sup> Huajca Jefté yajqui inihuaya nopa tlacame huan nochí nopa altepetl quitequitlalijque Jefté para ma eli ininjuez huan inintlayacanca. Huan

nopona campa itoca Mizpa tlamiyacapa Jefté qui-ilhui TOTECO nochí nopa camanali catli mon-equiyaya para quiselis itequi ica yejyectzi.

<sup>12</sup> Huan teipa Jefté tlatitlanqui ma quitlatzin-toquilitij inintlanahuatiijca amonitame: ¿Tlaque tijnequi tohuaya para ama tijnequi techhuilanás ipan totlal?

<sup>13</sup> Huan nopa tlanahuatijquetl amonita quinanquila itlayolmelajca Jefté huan quiilhui: “Timechhuilanase pampa anisraelitame antechichtequilijque nochí totlal quema anquisque tlali Egipto. Anmoaxcatijque catli pejqui ipan nopa atlajtli Arnón huan yohui hasta nopa atlajtli Jaboc huan onajsi hasta hueyatlı Jordán. Huajca ama techcuepili totlal ica cuali.”

<sup>14</sup> Huan Jefté sempa quintitlanqui sequinoc tlayolmelahuani para quiitatij nopa tlanahuatij-quetl tlen amonitame, <sup>15</sup> huan para ma quiilhuica ni camanali:

Tohuejcapan tatahua tiisraelitame amo moax-catijtoque inintlal moabitame, niyon amot-lal anamonitame. <sup>16</sup> Pampa quema tiisraelitame tiquisque tlali Egipto, tijpano que nopa hueyi atl catli itoca Chichiltic huan tiajsicoj hasta altepetl Cades. <sup>17</sup> Huan tohuejcapan tatahua tiisraelitame quitlajtlani-jque se favor nopa tlanahuatijquetl ipan tlali Edom para ma quincahuili panose ipan itlal. Pero nopa tlanahuatijquetl tlen Edom amo quincahuili ma panoca. Nojquiya quitlajtlani-jque nopa tlanahuatijquetl tlen tlali Moab. Nojquiya amo quincahuili ma

panoca huan yeca nopa israelitame mocajque altepetl Cades.

- 18 Teipa tohuejcapan tatahua panoque ipan nopa huactoc tlali campa amo tleno eli huan quiyahualojque tlali Edom huan tlali Moab hasta ajsitoj iteno tlali Moab ica campa hualquisa tonati. Huan mochijque ipan seyoc nali nopa atlajtli Arnón catli monepantía ica tlali Moab, pero amo calajque nopona.
- 19 Huajca nopa israelitame quitlatitlanijque Tlanahuatijquetl Sehón inintlanahuatijca amorreos catli mosehuiyaya para tlanahuatis ipan altepetl Hesbón. Huan quitlajtlanijque ma quincahuili panose para huelis ajsitij ipan catli tojuanti totlal.
- 20 Pero Tlanahuatijquetl Sehón amo motemachi ipan israelitame para quincahuilis ma panoca ipan itlal. Quinsentili isoldados huan mochihuatoj nechca altepetl Jahaza huan quinhuilanqui nopa israelitame catli eliyayaj tohuejcapan tatahua.
- 21 Pero TOTECO Dios tiisraelitame quichijqui para tohuejcapan tatahua ma quitlanica nopa Tlanahuatijquetl Sehón ihuaya isoldados huan moaxcatijque noch iintnal nopa amorreos. 22 Moaxcatijque iintnal amorreos catli pehua ica nopa atlajtli Arnón hasta ajsi campa atlajtli Jaboc, huan catli pehua campa huactoc tlali huan ajsi hasta hueyatl Jordán.
- 23 Huajca ¿para tlen ama anamonitame anquinequij antechquixtilise catli

TOTECO toDIOS tiisraelitame quinquixtili nopa amorreos huan quinmactili tohuejcapan tatahua tiisraelitame?

<sup>24</sup> Sintla amotlaixcopincayo, Quemos, anmechmacas se tlenijqui, anquiselisquíaj para moaxca, ¿amo neli? Tojuanti nojquiya tijmachilíaj toaxca catli TOTECO Dios techmacatoc pampa tetojtociyajqui toixpa para huelis tijtlanise. <sup>25</sup> ¿Huelis ta timomati más ticuali que Balac, icone Zipor, catli elqui tlanahuatijquetl ipan tlali Moab? Balac amo quinhuilanqui israelitame para quincuilis inintlah quema yaya itztoya. <sup>26</sup> Tiisraelitame ya tijpixtoque ni tlali 300 xihuitl huan ama ¿ta tijnequi? Nochi ni xihuitl tiitztoque ipan altepeme Hesbón, Aroer huan nochi ni sequinoc altepeme catli mocahua iteno nopa atlajtli Arnón. ¿Para tlen ica 300 xihuitl amo anquinectoque para anmoaxcatise?

<sup>27</sup> Na amo tleno nimitzchihuilitoc, pero ta quena, pampa ta tihualajtoc para techhuilanás. Pero TOTECO, yaya Juez, huan TOTECO techtlajtolsencahuas tiisraelitame huan anamonitame para tiquitase ajqueya quipiya tlajtlacoli.

Quej nopa, nopa tlacame catli quiitatoj nopa tlanahuatijquetl tlen amonitame ipan altepetl Amón quiilhuijque.

<sup>28</sup> Pero inintlanahuatijca amonitame amo quichihuili cuenta nopa camanali catli Jefté quititlanilijtoya.

*Catli Jefté quitlajtolcahuili TOTECO*

<sup>29</sup> Huan Itonal TOTECO hualajqui huan motlali ipan Jefté. Huan quinyacanqui isoldados huan quipanoque tlali Galaad huan Manasés, huan teipa panotoj altepetl Mizpa ipan tlali Galaad. Huan quisque nopona huan quinhuilanatoj nopa amonitame. <sup>30</sup> Huan Jefté quitlajtolcahuili TOTECO catli quichihuasquía, huan quillhui: “Sintla tijchihuas ma niquintlani nopa amonitame, <sup>31</sup> huajca catli achtihui quisaqui nochaj para nechseliqui quema nimocuepas huan ya nitlatlantos, na nimitziyocacahuilis quen se tlacajcahualistli.”

<sup>32</sup> Huan Jefté yajqui quinhuilanato nopa amonitame, huan TOTECO quichijqui ma quintlani.

<sup>33</sup> Huan Jefté quinmicti miyac icualancaitacahua. Huan quitlanqui 20 altepeme catli mocahuayaya tlen altepetl Aroer hasta altepetl Minit, huan nojquiya hasta Abel Keramin. Quej nopa israelitame quintlanque nopa amonitame.

<sup>34</sup> Huan quema Jefté mocueppui ichaj ipan altepetl Mizpa, quinamiquico iichpoca catli iyotzti icono eliyaya. Huan quinamiquico mijtotijtihualajqui huan tlatzotzontihualajqui ica pandero. <sup>35</sup> Huan quema Jefté quiitac para huala iichpoca para quinamiquiqui, quitzayanqui iyoyo ica cuesoli huan quijito:

—¡Ay tinoichpoca! Nelía hueyi nimotequipachohua huan ta catli techcuesolmaca. Na nijtencahuilijtoc Toteco para nijmacas catli achtihui nechnamiquiqui huajca monequi nijchihuas catli niquijtojtoc.

<sup>36</sup> Huajca nopa ichpocatl quiilhui itata:

—Notata, monequi xijchihua ica na quen tijtencahuilijtoc TOTECO, pampa TOTECO quichijqui xiquintlani mocualancaitacahua, nopa amonitame.

<sup>37</sup> Huan nopa ichpocatl nojquiya quiilhui itata: “San nijnequi techcahuili ma niyas achtihui campa nopa tepeme para ome metztlí ihuaya nohuampoyohua para nichocati pampa amo quema nimonamictis.”

<sup>38</sup> Huajca Jefté quicajqui iichpoca ma yohui para ome metztlí. Huan yajqui ihuaya ihuampoyohua ipan nopa tepeme huan choaque pampa amo quema monamictisquía. <sup>39</sup> Quema ya panotoya ome metztlí mocuepqui ichaj campa itata, huan Jefté temamacac iichpoca para quisentequipanos Toteco tiopan calijtic quen quiijtojtoc. Huajca amo quema itztoya ihuaya se tlacatl. <sup>40</sup> Huan pampa iichpoca Jefté motemamacac quichihuas catli itata quitencahuilijtoya Toteco, ama nopa israelita ichpocame yohuij iyoca huan quielnamiquij para nahui tonali sesen xihuitl.

## 12

### *Jefté huan iixhuihua Efraín*

<sup>1</sup> Teipa nopa hueyi familia Efraín mosentilijque isoldados huan panoque ica norte huan quiilhuijque Jefté:

—¿Para tlen tiyajqui tiquinhuilanato nopa amonitame huan amo technotztejqui para ma tiyaca mohuaya? Tojuanti tijtlamitlatise mochaj huan ta nojquiya.

<sup>2</sup> Huan Jefté quinnanquili:

—Na ihuaya noteiximatahuan titlaijijyohuiyayaj tlahuel ica nopa amonitame huan nimechnotzqui, pero amo anhualajque antechmanahuiquij. <sup>3</sup> Huan quema niquitac para amo anquinequij antechmanahuise, huajca masque nimoilhui nimiquisquia, chicahuac nimothali, huan niquinhuilanqui nopa amonitame. Huan quena, TOTECO quichijqui ma nitlatlani. Huajca, ¿para tlen anhualahuij ama para anquinequij antechhuilanase?

<sup>4</sup> Huan israelitame catli tlali Efraín ehuani quinhuetzquiliijque huan quinilhuijque nopa israelitame catli itztoyaj tlali Galaad ehuani: “Amojuanti amo neli anGalaad ehuani. San anitztoque nopa tlasolme catli ancholojtejque totlal Efraín huan Manasés.”

<sup>5</sup> Huajca Jefté quinsentili isoldados tlen tlali Galaad huan pejqui quinhuilana nopa tlali Efraín ehuani huan quintlanque. Huan Jefté ihuaya nopa Galaad ehuani moaxcatijque campa nochimomatque quiixcotonque hueyatl Jordán para calaquitij tlali Efraín. Huan nopa Efraín ehuani amo huelque mocuepaj inintlal. Huan nopa Efraín ehuani catli cholosnequiyayaj tlen ne tlahuilancayotl, ajsiyayaj campa nopa hueyatl huan quinequiyayaj panose, pero nopa Galaad soldados quintlatzintoquiliyayaj sintla ehuaj tlali Efraín. Huan sintla quiijtosquíaj para amo, <sup>6</sup> huajca quinyejyecosquíaj sintla melahuac amo nopona ehuaj. Huan para quimatise catli melahuac, quinnahuatiyayaj ma quiijtoca nopa camanali “Shibolet”. Huan sintla amo huelquisquíaj quitenquixtise cuali huan san quiijtosquíaj

“Sibolet”, huajca quimatisquíaj para nelía Efraín ehuani. Huan sintla eliyayaj Efraín ehuani, huajca quinitzquiyyaj huan quinmictiyayaj nopona nechca hueyatl Jordán. Huan quej nopa quiniximatque huan quinmictijque 42 mil Efraín tlacame.

<sup>7</sup> Huan Jefté, catli ejqui tlali Galaad, itztoya juez huan tlanahuati ipan nopa israelitame para chicome xihuitl. Teipa mijqui Jefté huan quitojque nopona ipan se altepetl ipan tlali Galaad.

### *Ibzán, nopa majtlacpa juez*

<sup>8</sup> Teipa se tlacatl itoca Ibzán catli ehuayaya altepetl Belén itztoya juez huan tlanahuati campa nopa israelitame. <sup>9</sup> Huan Ibzán quinpixqui 30 itelpocahua huan 30 iichpocahua. Huan nochí nopa 30 iichpocahua quintemactili para monamictise ica tlacame catli tlacatque ipan sequinoc huejhueyi familias. Huan nojquiya nopa 30 itelpocahua quinhualiquili ichpocame tlen sequinoc huejhueyi familias para mosihuajtise. Huan Ibzán itztoya juez huan quinnahuati israelitame para chicome xihuitl. <sup>10</sup> Teipa mijqui huan quitojque nechca altepetl Belén.

### *Elón, nopa juez majtlactli huan se*

<sup>11</sup> Teipa elqui juez Elón catli tlacatqui ipan nopa hueyi familia Zabulón, huan quipixqui tequiticayotl ica israelitame para majtlactli xihuitl. <sup>12</sup> Huan mijqui Elón huan quitojque nechca altepetl Ajalón ipan tlali Zabulón.

### *Abdón, nopa juez majtlactli huan ome*

<sup>13</sup> Teipa elqui juez Abdón, icone Hilel, catli ehuayaya altepetl Piratón. <sup>14</sup> Huan Abdón quinpixqui 40 itelpocahua huan 30 itlaca ixhuihua, huan inijuanti nemiyabaj ipan 70 burrojme. Huan Abdón quinnahuati israelitame para chicueyi xihuitl. <sup>15</sup> Huan mijqui Abdón catli eliyaya icone Hilel catli ejqui altepetl Piratón. Huan quitojque ipan altepetl Piratón ipan tlali Efraín ipan nopa tepeme ipan nopa tlali catli achtihuiya eltoya iniaxcahua nopa amalecitame.

## 13

### *Quenicatza tlacatqui Sansón*

<sup>1</sup> Huan nopa israelitame sempa quichijque catli amo cuali iixpa TOTECO huan TOTECO quintemactili ininmaco nopa filisteos para ma quinnahuatica chicahuac para 40 xihuitl. <sup>2</sup> Huan itztoya se tlacatl catli itoca Manoa ipan nopa hueyi familia Dan huan yaya ehuayaya altepetl Zora. Huan isihua Manoa amo huelqui coneziya. <sup>3</sup> Huan se tonal monexti itequihuia TOTECO iixtla ni sihuatl, huan quiilhui: “Masque hasta ama ticuahuactoya, ama ticonecuis huan tijtlacatiltis se oquichpil. <sup>4</sup> Huajca ximomocuitlahui para amo xiquiji xocomeca atl niyon catli hueli tlaili catli cococ. Niyon amo xijcua se tlenijqui catli mitzchihuas amo tlapajpactic iixpa TOTECO. <sup>5</sup> Pampa ama ticonecuis huan tijtlacatiltis se oquichpil catli elis se nazareo huan elis tlaiyocatlalili para iaxca Toteco Dios hasta quema tlacatis. Amo quema motzoncaltequis. Huan yaya quipehualtis quinmanahuis israelitame ininmaco nopa filisteos.”

**6** Huan nopa sihuatl hualajqui huan quipohuilo  
ico ihuehue catli panoc huan quijito: “Se tlacatl  
tlen Toteco Dios hualajqui campa na. Yaya ne-  
siyaya quen se itequihua Toteco Dios. Tlahuel  
yejyectzi eliyaya hasta temajmati para nijtlachilis.  
Huan amo nijtlatzintoquili canque huala huan  
ajqueya ya, niyon amo nechilhui itoca. **7** Pero  
nechilhui para niconecuis huan nijtlacatiltis se  
oquichpil. Yeca ama amo ma niquiji xocomeca  
atl, niyon amo ma niquiji tlen hueli tlaili catli  
cococ. Niyon amo ma nijcua se tlenijqui catli  
nechchihuas amo tlapajpactic iixpa Toteco Dios,  
pampa ni oquichpil elis se nazareo catli senquis-  
toc tlaiyocatlalili para TOTECO Dios tlen itlacatilis  
hasta quema miquis. Quej nopa nechilhui.”

**8** Huajca Manoa motlatlajti ica TOTECO huan  
quiilhui: “Ay noTeco, nimitztlajtlanía sempa ma  
huala nopa tlacatl catli ta tijtitlanqui. Ma tech-  
nextiliqui quenicatza tiquiscaltise nopa oquichpil  
catli tlacatis.”

**9** Huan Toteco Dios quitlacaquili Manoa huan  
itequihua Toteco Dios sempa monexti campa  
nopa sihuatl quema nemiyaya imila, pero ihue-  
hue amo nemiyaya ihuaya. **10** Huajca nopa sihu-  
atl nima motlalojejqui quiyolmelahuato ihuehue  
huan quiilhui:

—Sempa monextijtoc nohuaya nopa tlacatl catli  
hualajqui ne seyoc tonal.

**11** Huajca Manoa moquetztiquisqui huan yajqui  
ihuaya isihua hasta campa nopa tlacatl itztoya  
huan quiilhui:

—¿Ta tieli nopa tlacatl catli tijcamanalhuico  
nosihua ne seyoc tonal?

Huan nopa tlacatl quinanquili:

—Quena, na.

<sup>12</sup> Huajca Manoa quijito:

—Quema tlacatis ni oquichpil catli tiquijtojtoc, ¿quenicatza monequi tiquiscaltise? ¿Tlaque tlanahuatilme tijnextilise para ma quitoquilis ipan inemilis?

<sup>13</sup> Huan itequihua TOTECO quinanquili:

—Mosihua ma quichihua nochí tlanahuatili catli nijmacatoc. <sup>14</sup> Ma amo quicua catli huala ipan xocomeca tzontli. Ma amo quiji xocomeca atl niyon tlen hueli tlaili catli cococ. Niyon amo ma quicua se tlacualistli catli quichihuas amo tlapajpactic iixpa Toteco. Nochi ya ni catli niquilhuijtoc ma quichihua.

<sup>15</sup> Huan Manoa ayamo momacayaya cuenta para nelía nopa tlacatl eliyaya itequihua TOTECO huan quiilhui:

—Timitztlajtlaníaj ximocahua tohuaya se tla-toctzi para timitzsencahuilise se pilchivojtzi para tijcuas.

<sup>16</sup> Huan itequihua TOTECO quinanquili Manoa:

—Masque nimocahuas, amo nijcuas motlacualis. Pero sintla tijnequi tijsencahuas se pilchivojtzi para tijmacas TOTECO quen se tlacajcahualistli tlatlatili, caultitoc.

<sup>17</sup> Huajca Manoa quiilhui itequihua TOTECO:

—¿Tlaque motoca para huelis timitzhuey-itlepanitase quema tlacatis nopa oquichpil?

<sup>18</sup> Pero itequihua TOTECO quinanquili:

—Amo techtlatzintoquili notoca pampa tlahuel onpano cuajcualtzi notoca hasta amo aqui huelis quimachilis.

<sup>19</sup> Huajca Manoa quicuic nopa pilchivojtzi para tlacajcahualistli ihuaya nopa tlacajcahualistli tlen harina huan nopona quitencajqui iiexpa TOTECO ipan se tetl. Huan itequihua TOTECO quichijqui se tiochicahual nextili quema noja quitlachilijtoyaj Manoa ihuaya isihua. <sup>20</sup> Huan quichijqui se titl ma tlejco tlen nopa tlaixpamitl hasta ilhuicac, huan itequihua TOTECO tlejcoc ilhuicac tlatlajco nopa tlitl. Huan quema Manoa ihuaya isihua quiitaque catli panoc, motlancuaquetzque huan moixhuijtzonque hasta tlalchi. <sup>21</sup> Huan itequihua TOTECO ayacmo monexti ihuaya Manoa ica isihua. Huajca Manoa quimatqui para eliyaya itequihua TOTECO. <sup>22</sup> Huan Manoa quiilhui isihua:

—Temachtli timiquise pampa tiquitztoque Toteco Dios.

<sup>23</sup> Huan isihua quinanquili:

—Sintla TOTECO quinequisquía techmictis, amo quiselijtosquía nopa tlacajcahualistli tlatlatili, niyon tlen harina. Amo technextilijtosquía nochí ni tlamantli, niyon amo techyolmelajtosquía catli panos teipa.

<sup>24</sup> Huan teipa nopa sihuatl quitlacatilti se oquichpil huan quitocaxtlali Sansón. Huan nopa oquichpil moscalti, huan motlacachijqui huan TOTECO quitiochijqui. <sup>25</sup> Huan teipa quema Sansón itztoya campa mocahuayayaj iteipan ixhuihua Dan tlatlajco altepeme Zora huan Estaol, pejqui nesi para Itonal TOTECO hualayaya ipan ya huan quimacayaya miyac chicahualistli.

## 14

*Inenamictil Sansón, nopa juez majtlactli huan*

*expa*

<sup>1</sup> Huan se tonal Sansón yajqui ipan altepetl Timnat huan quiitac se filistea ichpocatl catli quiixtocac. <sup>2</sup> Huan mocuepqui ichaj huan quiilhui itataihuaya inana:

—Niquixtoca se ichpocatl catli ehua Timnat huan nijnequi xiyaca xiquijtlanitij para nimocuilis. <sup>3</sup> Huan itata ihuaya inana quihilhuijque:

—¿Amo hueli tipantis se ichpocatl nica ihuaya toteiximatcahua o ipan ni altepetl? ¿Para tlen monequi timocuilis se filistea sihuatl catli amo quineltoca Toteco, niyon amo motequiliyaj ipan intlacayo nopa tlanextilijcayotl circuncisión quen Toteco tlanahuatía?

Huan Sansón quinanquili itata:

—Pero na ya nopa niquixtoca, techijtlanilitij para nimocuilis.

<sup>4</sup> Huan itata huan inana amo quimatiyaya para nochí ni tlamantli panoyaya pampa TOTECO quen nopa quinequiyaya ma pano. Yaya quicualtlaliyaya para ica ni tlamantli quintlanisquía nopa filisteos pampa ipan nopa tonali inijuanti quinahuatiyayaj tlali Israel ehuani.

<sup>5</sup> Huan quema Sansón yohuiyaya altepetl Timnat ihuaya itata huan inana, ajsite campa nopa miyac xocomeca milme catli iniaxcahua nopa Timnat ehuani. Huan quisqui campa ya se león catli nelía tetic huan nanalcatihualayaya para quiajsis. <sup>6</sup> Huan Itonaltzi TOTECO motlali ipan Sansón ica miyac chicahualistli. Huan masque amo tleno quipiyayaya imaco, quicocotetzqui nopa león quen elisquía se pilchivojtzi. Pero amo

quiilhui itata huan inana catli panotoya. <sup>7</sup> Huan aj sito altepetl Timnat huan quicamanalhuijque nopa ichpocatl catli quiixtocayaya huan tlasencajque.

<sup>8</sup> Huan teipa quema Sansón sempa yohuiyaya ichaj nopa ichpocatl para quicuiti, Sansón quisqui tlen iojhui para quitlachiliti itlacayo nopa león catli quimictijtoya. Huan quiitac ipani quinpixtoya cuanecme huan nectli. <sup>9</sup> Huan quiquixti nectli huan quicuajtiyajqui ipan ojtli. Huan quema sempa quinajsito itata huan inana nojquiya quinmacac quentzi nectli ma quicuaca, pero amo quinilhui para nopa nectli quicuitoza ipan se león itlacayo.

<sup>10</sup> Huan itata Sansón yajqui ichaj nopa ichpocatl para tlami tlasencahuas para nopa ilhuitl tlen nemamictili. Huan Sansón quichijqui se ilhuitl para telpocame catli elisquíaj ihuampoyohua ipan nopa nemamictili pampa quen ni momajtoyaj quichihuaj catli mosihuajtiyaya. <sup>11</sup> Huan imonta huan imona quiitaque para ajisco Sansón huan quinnotzque 30 telpocame filisteos para ma itztocha ihuaya ipan iilhui. <sup>12</sup> Huan Sansón quen ni quinilhui nopa telpocame:

—Nimechflatzintoquilis se ahuil tlatzintoquila catli ohui huan sintla antechilhuise catli quijitosnequi ipan ni chicome tonali tlen ni ilhuitl, huajca na nimechmacas 30 yoyomitl catli senquistoc lino huan 30 yoyomitl para quema anilhuichihiase. <sup>13</sup> Pero sintla amo anquimatise tlaque quijitosnequi, huajca antechmacase 30 noyoyo tlen lino, huan 30 noyoyo para quema niilhuichihiwas.

Huan quinanquilijque:

—Techilhui nopa ahuil tlatzintoquili catli ohui huan timitztlacaquilise.

<sup>14</sup> Huan quen ni quinilhui:  
“Ipan se tecuajquetl, quisqui tlacualistli,  
huan tlen se catli tetic quisqui catli tzopelic.”

Huan panoc eyi tonali huan nopa tlanotzalme amo quimatque tlaque quiijtosnequi nopa ahuil tlatzintoquili catli ohui. <sup>15</sup> Huan ipan chicompa tonali, quiilhuijque isihua Sansón:

—Xijtlatzintoquili Sansón tlaque quiijtosnequi nopa ahuil tlatzintoquili catli ohui, pampa sintla amo, tijtlatise ichaj motatahua huan ta nojquiya. ¿Huelis antechnotzque ipan ni ilhuitl para antechtominqüixtilise?

<sup>16</sup> Huajca isihua Sansón pejqui chocha iixpa Sansón huan quiijto:

—Amo techicnelía. San techcualancaita pampa amo tijnequi techilhuis tlaque quiijtosnequi nopa ahuil tlatzintoquili catli ohui catli tiquintlatzintoquili nopa telpocame nica.

Huan Sansón quinanquili:

—Niyon notata, niyon nonana amo niquinilhuijtoc. ¿Para tlen monequi nimitzilhuis ta?

<sup>17</sup> Huajca nopa sihuatl chocac iixtla Sansón nochí nopa tonal quemá noja oncac nopa ilhuitl, huan quemá ajsic nopa tonali chicome, Sansón quiilhui isihua tlaque quiijtosnequi nopa ahuil tlatzintoquili catli ohui pampa quinelcualancamacatoya. Huan nopa sihuatl nima quinilhuito nopa telpocame catli quiijtosnequi. <sup>18</sup> Huan quemá ayamo huetziyaya tonati ipan tonali chicome, nopa telpocame hualajque huan quipohuilijque Sansón

tlaque quiijtosnequi nopa ahuil tlatzintoquili.  
Quiijtojque:

“¿Tlaque más tzopelic que nectli?  
¿Huan tlaque más tetic que se león?”

Huan Sansón quinnanquili:

“Sintla amo anquichijtosquíaj nosihua ma  
choquaqui noixpa, amo anquimajtosquíaj tlaque  
quiijtosnequi catli nimechtlatzintoquili.”

<sup>19</sup> Huan Itonaltzi TOTECO motlali ipan Sansón  
huan quimacac chicahualistli huan yajqui altepetl Ascalón. Nopona quinmicti 30 tlacame  
huan quinquixtili ininyoyo. Huan quinmacac  
nopa telpocame catli quimatque tlaque quiij-  
tosnequi nopa ahuil tlatzintoquili. Huan Sansón  
nelcualaniyaya huan mocuepqui ichaj ihuaya  
itata. <sup>20</sup> Huajca isihua Sansón quimactilijque ma  
mocuili seyoc catli eliyaya inelhuampox, yaya  
catli itztoya más nechca ya ipan nopa nemamictili.

## 15

<sup>1</sup> Panoc miyac tonali huan ajsic ipohual para  
quitequise trigo. Huan Sansón yajqui quipaxaloto  
isihua pampa quinequiyaya ihuaya itztos. Huan  
quihuiquili se pilchivojtzi huan quiilhuito itata:

—Nijnequi nicalaquis campa nosihua itztoc  
ipan icuarto.

Pero itata nopa ichpocatl amo quicahuili ma  
calaque, <sup>2</sup> huan quiijto:

—Na nimoilhui tijcajtejtoya huan yeca nijmac-  
tili mohuampox. Pero nijpixtoc seyoc noichpoca  
catli más tziquitetzi. ¿Amo tiquita más yejyectzi?  
Huajca ya ximocuili quen ipatlaca.

*Sansón quitlati ininpixquilis ica cayochime*

**3** Huan Sansón quijito:

—Ayacmo aqui huelis nechtlajtlacoltis ica catli fiero nimechchihuilis anfilisteos, pampa amo cuali antechchihuilijtoque.

**4** Huan Sansón yajqui huan quinitzqui 300 cayochime huan quincuitlapilipí ojome cayochime huan tlatlajco sese ome inincuitlapilhua quinilpili se tlicuahuitl. **5** Teipa quitlati nopa tlicuahuitl huan quinmajcajqui nopa cayochime ma motlalotjiyaca campa inintlatoc nopa filisteos. Quej nopa tlami tlatlac nopa trigo catli moquetzayaya huan catli ya quitectoyaj ipan ininmil. Nojquia tlatlac ininxocomecamil huan nochí inincua tlen olivo. Nochi catli quitectoyaj tlatlac.

**6** Huan nopa filisteos quijitojque:

—¿Ajqueya quichijqui ya ni?

Huan tlananquilijque:

—Sansón quichijqui, yaya catli imontica nopa tlacatl catli ehua altepetl Timnat pampa quiquirtili isihua huan quimactili catli inelhuampox ipan nopa nemamictili.

Huan nopa filisteos hualajque huan quitlatijque nopa sihuatl ihuaya itata.

**7** Huan quema Sansón quimatqui catli quichijque nopa filisteos, quinilhui:

—Pampa anquichijque ya nopa, ama amo nimosiyajquetzas hasta nimechtzontlamiltis.

**8** Huan quintlamimicti nochí filisteos nopena huan amo quintlasojtlac. Teipa yajqui para itztotl nechca tepetl Etam campa onca se tecacahuatl ipan tetl.

*Sansón temicti ica icamachal omiyo se burro*

<sup>9</sup> Huan nopa filisteos yajque mochihuatoj ipan tlali Judá nechca altepetl Lehi. <sup>10</sup> Huan tlali Judá ehuani quintlatzintoquilijque:

—¿Para tlen anhualahuij nica?

Huan nopa filisteos tlananquilijque:

—Tihualahuij tiquitzquiuij Sansón para ti-juepilise ica catli techchihuilijtoc.

<sup>11</sup> Huan mosentilijque eyi mil israelita tlacame catli ejque tlali Judá huan yajque campa Sansón ipan nopa tetl nechca Etam huan quiilhuijque:

—¿Amo tijmati nopa filisteos quipiyaj tequit-icayotl ica tojuanti huan ininmaco tiitztoque?  
¿Para tlen tiquinhuitlantoc quej ni?

Huan Sansón quinnanquili:

—San niquincuepilijtoc catli nechchihuilijt-  
toque.

<sup>12</sup> Huajca nopa Judá ehuani quiilhuijque:

—Tihualahuij timitzitzquise para timitztemac-tilise ininmaco nopa filisteos.

Huan Sansón quinnanquili:

—Xijtestigojquetzaca Toteco para amo antech-mictise.

<sup>13</sup> Huan nopa Judá ehuani tlananquilijque:

—¡Amo! Amo timitzmictise. San timitzitzquise huan timitztemactilise ininmaco.

Huajca quincahuili ma quitatacatzoca ica ome mecatl catli yancuic huan quichihualtijque ma quis a tlen nopa tepetl. <sup>14</sup> Huan Sansón ajsito nepa altepetl Lehi ilpitoc, huan nopa filisteos quisacoj tlhuejchijtihualahuij para quinamiquise. Pero Itonal TOTECO motlali ipan Sansón, huan nopa mecatl yancuic catli ica quiilpijtoyaj elqui quen

nopa icpatl lino catli tlatlatoc, nochi cocotocac huan Sansón mocajqui majcajtoc. <sup>15</sup> Huan quipanti se pilburrojtzí icamachal omiyo catli noja yancuic eltoya huan quitlananqui huan ica ya nopa quinmicti mil tlacame. <sup>16</sup> Huajca Sansón quiijto:

“Ica se burro icamachal omiyo,  
nijchijqui se tlamontomitl.

¡Amo! Nijchijtoc nelía ome tlamontomitl  
ica se burro icamachal omiyo,  
pampa ica niquinmicti mil tlacame.”

<sup>17</sup> Huan quema tlanqui camanalti, quimajcajqui nopa camachali, huan nopona quitocaxti Ramat Lehi. (Ramat Lehi quinequi quiijtos “tepetyl tlen icamachal omiyo se burro”).

<sup>18</sup> Huan teipa Sansón pejqui amiqui tlahuel huan motlatlajti ica TOTECO huan quiijto: “Nelía hueyi catli tijchijtoc ica nomax pampa techmaquixtijtoc tiisraelitame tlen nopa filisteos. Huajca ama, amo techcahuili ma niamijcamiquis huan nimocahuas ininmaco catli amo mitzneltoquilfaj.”

<sup>19</sup> Huajca Toteco Dios quicoyoni nopa tetl nopona nechca Lehi huan mexqui atl. Huan Sansón atlic huan pejqui quipiya más chicahualistli. Huan quitocaxti nopona Enhacore. (Enhacore quinequi quiijtos “nopa ameli tlen nopa tlacatl catli motlatlajti”.) Huan nopa ameli hasta ama eltoc nopona nechca Lehi.

<sup>20</sup> Huan Sansón quinyacantiyajqui israelitame para 20 xihuitl pero nopa filisteos noja quinahuatiyayaj nopa tlali.

**16***Sansón quiqxiti ipuertas altepetl Gaza*

<sup>1</sup> Se tonal Sansón yajqui altepetl Gaza. Nopona quitac se ahuilnенca sihuatl huan cochqui ihuaya. <sup>2</sup> Huan nimantzi Gaza ehuani quimatque Sansón ajositoya huan quiyahualojque nopa altepetl. Huan seyohual quimocuitlahuijque puerta-jeno itepa nopa altepetl para amo huelis quisas. Huan amo aqui moliniyaya, san moilhuiyaya: “Mostla quema tlanesis, tijmictise.”

<sup>3</sup> Pero Sansón san mocajqui ihuaya nopa ahuilnenca sihuatl hasta tlajco yohual. Teipa mejqui huan ica ichicahualis quicuitejqui nopa huejhueyi cuapuertas ipan itepa nopa altepetl ihuaya iome huejhueyi tlaquetzalo. Huan quiquech-pantlalijtejqui huan tlejcoc itzonatipa nopa tepetl catli eltoc iixmelac altepetl Hebrón huan nopona quicajtejqui.

*Sansón huan Dalila*

<sup>4</sup> Teipa quema panoc tonali, Sansón quiiximatqui se sihuatl catli itoca Dalila tlen tlali Sorec huan quiicneli. <sup>5</sup> Huan nopa tlayacanani tlen filisteos yajque quicamanalhuitoj Dalila. Quiilhuijque ma quitemo canque huala ichicahualis Sansón para quej nopa quimatise quenicatzza quitlanise huan quitatacatzose. Quiilhuijque quimacasquíaj mil 100 plata tomi catli pajpatiyo.

<sup>6</sup> Huajca Dalila quiilhui Sansón:  
—Techilhui canque huala mochicahualis pampa amo aqui hueli mitztatacatzohua para mitztlanis.

<sup>7</sup> Huan Sansón quinanquili nopa sihuatl:

—Sintla nechtatacatzosquíaj ica chicome cuetlax mecatl catli ayamo huactoc quen quitequi-huíaj ipan se cuahuitoli, huajca tlamic nochicahualis huan nielis quen sequinoc tlacame.

<sup>8</sup> Huan nopa tlayacanani quihualiquilijque nopa sihuatl chicome cuetlax mecatl catli ayamo huactoc, huan ica quitatacatzo Sansón. <sup>9</sup> Huan quintlatijtoya nopa tlacame ipan se cuarto huan quema tlantoya quitatacatzohua, Dalila quiijito:

—¡Sansón, nopa filisteos itztoque nica para mitzitzquise!

Pero Sansón quicotonqui nopa cuetlax mecatl quen elisquía san se icpatl catli tlatlatoc. Huajca amo aqui quimatqui canque huala ichicahualis.

<sup>10</sup> Huan Dalila quiilhui Sansón:

—San techcrajayahua huan amo techilhuía catli melahuac. Ama techilhui melahuac quenicatza se huelis mitztatacatzos.

<sup>11</sup> Huan Sansón quen ni quiilhui:

—Sintla nechtatacatzose ica mecatl catli yan-cuic huan amo tlatequihuili, huajca tlamic nochicahualis huan nielis quen sequinoc tlacame.

<sup>12</sup> Huajca Dalila quicuic mecatl catli yan-cuic huan ica ya nopa quitatacatzo huan quiilhui:

—¡Sansón, nopa filisteos hualajtoque mitzitzquise!

Huan nelía nopa tlacame catli tlapijpiyaj motlatijtoyaj calijtic. Pero Sansón quicotonqui nopa mecatl quen elisquía icpatl. <sup>13</sup> Huajca Dalila quiilhui Sansón:

—Hasta ama noja techcrajayahua huan san techistlacahuía. Techilhui quenicatza se huelis mitztatacatzos.

Huajca Sansón quiilhui:

—Sintla se quicuis ni chicome tlaxinepaloli tlen notzoncal huan quixinpalos ihuaya se yoyomitl huan quitatacatzos ipan cuaestacas, huajca tlamis nochicahualis.

<sup>14</sup> Huan quema cochqui Sansón, Dalila quixinpalhuili itzoncal huan quitatacatzo ipan cuaestacas huan quiilhui:

—¡Sansón, nopa filisteos hualajtoque mitzitzquise!

Pero Sansón sempa isatiquisqui huan quipostejqui nopa cuaestacas huan nopa yoyomitl. <sup>15</sup> Huan nopa sihuatl quiijto:

—¿Quenicatza tiquijtohua techicnelía, huan amo timotemachía ipan na? Techcrajcayajtoc eyi huelta huan ayamo techilhuijtoc canque huala mochicahualis.

<sup>16</sup> Huan pampa Dalila mojmostla quicualanca-macayaya, Sansón ayacmo huelqui moiyyohuía para amo quiilhuis canque huala ichicahualis.

<sup>17</sup> Huajca Sansón moyolyamanili huan quiilhui:

—Amo quema nimotzoncaltectoc pampa nise nazareo catli niiaxca Toteco Dios hasta quema ayamo nitlacatiyaya. Sintla se nechximas huajca nopa chicahualistli nechtalcahuis, huan niyamaniyas huan nielis quen ne sequinoc tlacame.

<sup>18</sup> Huan quema Dalila quimatqui para ama nelía melahuac quiilhuijtoya nochí catlí elqui ipan iyolo sempa quinnotzqui nopa tlayacanani huan quinilhui:

—Sempa xihualaca pampa ama, quena, nechilhuijtoc catli melahuac.

Huajca nopa macuilme tlayacanani tlen filisteos hualajque campa Dalila huan quihualicayayaj nopa tomi para quitlaxtlahuise.<sup>19</sup> Huan Dalila quichijqui ma cochi Sansón ipan icuaxanco, huan quema ya cochtoya, quinotzqui se tlacatl para ma quixima. Huan quitequili itzoncal catli tlaxinepaloli ica chicome tlaxinepaloli. Huan Dalila pejqui quitlaijiyohuiltía pampa quiitac quitlalcahui ichicahualis.

<sup>20</sup> Huan nopa sihuatl quiilhui:

—¡Sansón, nopa filisteos hualahuij mitzitzquiquij!

Huan Sansón isatiquisqui huan moilhui:

—Amantzi nimomanahuis quen nochipa nijchijtihualajtoc.

Pero Sansón amo quimatiyaya sintla TOTECO Itonal ya quitlalcahuijtoya, huan ayacmo itztoya ihuaya.<sup>21</sup> Huan nopa filisteos quiitzquijque huan quiixteyolquixtijque huan quihuicaque hasta altepetl Gaza. Nopona quitatacatzozque ica tepos cadena tlen bronce huan quichihuilijque ma tisi quen se tequipanojquetl nopona ipan tlatzactli.

### *Imiquilis Sansón*

<sup>22</sup> Pero ica tonali itzoncal Sansón sempa pejqui moscaltía. <sup>23</sup> Huan teipa nopa filisteos catli tlayacanayayaj quichijque se hueyi ilhuitl para quipaquilismacase huan quimacase tlacajcahualistli ininteteyo, Dagón. Quiijtohuayayaj:

“Todios techmactili tomaco tocualancaitaca, Sansón.”

**24** Huan quema nopa miyaqui filisteos quiitaque Sansón, quihueyichijque ininteteyo Dagón huan quiijtojque:

“Todios techmactilijtoc tomaco tocualancaitaca.

Yaya catli quisosolojtoc nochí totlal.

Yaya catli quinmicti miyac tlen tohuampoyohua, ama tijpixtoque tomaco.”

**25** Huan quema nelihuintitoyaj huan monelhueyimajtoyaj, quiijtojque:

—Xijhualicaca Sansón ma techpaquilismaca.

Huan yajque quicuitoj campa tlatzactli huan quiquetzque tlatlajco campa nopa ome tlaquetzalme. Huan nochí quiuetzquiliyayaj huan ica paquiyayaj. **26** Huajca Sansón quiilhui nopa oquichpil catli quimatinanayaya:

—Xijtlali nomax ipan nopa ome tlaquetzalme catli quitlanantoc itzontzajca ni cali pampa njnequi nimotlatzquilis.

**27** Huan nelía temitoya nopa hueyi tiopamitl ica filisteo tlacame huan sihuame. Nopona nojquiya itztoyaj nochí inintlanahuatijcahua. Huan itzonatipa nopa cali mosehuijtoyaj quen 3 mil tlacame huan sihuame catli quitlachiliyayaj Sansón tlatzintla huan ica paquiyayaj.

**28** Huajca Sansón motlatlajti ica TOTECO huan quen ni quiilhui: “TOTECO, Ta Catli Más Tijpiya Tlanahuatili, techelnamiqui huan techtlacaquili san ama. San ni huelta techmaca chicahualistli sempa para huelis niquinquepilis ni filisteos catli nechquixtilijque noixteyol.”

**29** Huan Sansón quitlali imax ipan nopa ome tlaquetzalme catli eltoya tlatlajco ipan nopa hueyi cali huan catli quitlanantoya itzontzajca. Huan

Sansón ica nochí ichicahualis quincuatopejqui nopa tlaquetzalme se ica inejmac huan se ica imaopoch.

<sup>30</sup> Huan Sansón quijito: “Ma nimiqui ininhuaya ni filisteos.”

Huajca mopacho huan ica nochí ichicahualis quincuatopejqui nopa huejhueyi tlaquetzalme catli quitlanantoyaj nopa tzontzajcayotl. Huan nopa hueyi cali campa ilhuichihuayayaj huetzqui huan quintzonpechi nochí nopa tlanahuatianni huan nochí filisteos catli nopona itztoyaj. Huajca Sansón quinmicti más miyac filisteos nopona quema ya nojquiya mijqui huan amo quen quinmicti ipan nochí inemilis. <sup>31</sup> Huan hualajque nochí iicnihua Sansón huan nochí iteiximatcahua itata, huan quicuicoj itlacayo huan quihiuicaque. Huan quitocatoj tlatlajco altepeme Zora huan Estaol ipan nopa tecacahuatl campa quitoctoyaj Manoa catli eliyaya itata. Huan Sansón quinya-cantoya israelitame para 20 xihuitl quen ininjuez.

## 17

### *Micaía quipixqui tlen ya itiopa*

<sup>1</sup> Campa tepeme ipan tlali Efraín itztoya se tlapatatl catli itoca Micaía. <sup>2</sup> Huan se tonal Micaía quiilhui inana:

—Na nijcajqui tijtelchihua nopa tlachtejquetl catli quiichtejqui ni mil 100 plata tomi. Pero nica eltoc huan na catli niquichtectoc.

Huan inana quinanquili:

—Ma TOTECO mitztiochihua, nocone, pampa techilhuijtoc catli melahuac.

<sup>3</sup> Huan quicuepili inana nopa mil 100 plata tomi, huan inana quiijto:

—Ni tomi nijnequi niquiyocatlalis para TOTECO por ta, nocone. Nijnequi para ma quinsencahuas ome teteyome. Se ma quitejtequica huan ne seyoc ma quitejtejtzonaca tlen ni plata. Huajca sempa nimitzcuepilía ni tomi.

<sup>4</sup> Pero nopa tlacatl sempa quicuepili inana nopa tomi. Huajca inana quicuic 200 tlen nopa plata tomi huan quimacac se teposchijquetl para quinsencahuas teteyome. Se teteyotl ma san quitejtejtzonaca ica plata huan seyoc ma quitejtequica huan ma quiatilica nopa plata. Huan quema tlanque quicualtlalijque, quitlalijque ipan ichaj Micaá. <sup>5</sup> Huan ichaj ni tlacatl Micaá temitoya ica teteyome huan quipixtoya nojquiya se yolix-pantzajcayotl huan sequin pilteteyotzitz. Huan Micaá hasta quitlali se itelpoca para ma eli catli ya itotajtzi. <sup>6</sup> Quej nopa quichijqui pampa ipan nopa tonali amo aqui tlanahuatiyaya ipan nopa tlali Israel, huan sese israelita quichihuayaya san catli ya quinequiyaya.

<sup>7</sup> Huan itztoya se telpoca tlacatl catli eliyaya iixhui Leví catli momajtoya paxalojtinemi campa hueli huan mocahuayaya ipan altepetl Belén ipan tlali Judá, <sup>8</sup> pero quicajqui nopa tlali huan ya-jqui quitemoti seyoc altepetl para ipan mocahuas. Huan ipan ojtli ajsico campa ichaj Micaá campa nopa tlachiquilme ipan tlali Efraín. <sup>9</sup> Huan Micaá quitlatzintoquili nopa telpoca tlacatl:

—¿Canque tiehua?

Huan nopa levita telpocatl quinanquili:

—Na nihuala altepetl Belén ipan tlali Judá huan nijtemohua canque huelis nimocahuas.

<sup>10</sup> Huajca Micaía quiilhui:

—Ximocahua nochaj huan nimitzchihuas tino-totajtzi huan nimitztlaxtlahuis majtlactli plata tomi se xihuitl. Nojquiya nimitzmacas moyoyo huan motlacualis.

Huan nopa levita yajqui ihuaya. <sup>11</sup> Huajca nopa levita mocajqui ichaj huan elqui quen se iteiximatca. <sup>12</sup> Huan Micaía quiyyocatlalí ni levita tlacatl para ma eli inintotajtzi, huan mocajqui ichaj.

<sup>13</sup> Huan Micaía moilhui: “Ama temachtli TOTECO nechtiochihuas pampa nijtlapejpenijtoc se totajtzi catli nelía se iixhui Leví.”

## 18

### *Iteipan iixhuihua Dan quicajtejtoyaj TOTECO*

<sup>1</sup> Ipan nopa tonali amo aqui tlanahuatiyaya ipan tlali Israel. Huan nojquiya ipan nopa tonali iteipan ixhuihua Dan ayamo quipiyayayaj nochí inintlá huan quinequiyayaj moaxcatise nochí quen sequinoc huejhueyi familias tlen iixhuihua Israel quichijtoyaj. <sup>2</sup> Huajca iixhuihua Dan quint-lapejpenijque maculti tlahuilanca tlacame catli tetique catli ejque altepeme Zora huan Estaol. Huan quintitlanque ma quitlachilitij ichtacatzi campa elisquía inintlá huan ma quiitaca quenicitza eltoc. Huan quinlhuijque ma yaca huan quitlachilitij nopa tlali.

Huan ipan ojtlí inijuanti yajque hasta campa tepeme ipan tlali Efraín. Huan quema ajsitej ichaj Micaía para tonilise, <sup>3</sup> quitoscacajque nopa levita

tlacatl catli nopona mocahuayaya huan quitosca-machilijque. Huajca quitlatzintoquilijque:

—¿Tlaque tijchihua nica? ¿Para tlen tihualajqui?  
Huan ¿para tlen timocahua nica?

<sup>4</sup> Huan nopa levita quinnanquili huan quinilhui  
nochi catli panotoya. Nojquiya quijito:

—Huan nojquiya Micaía quinejqui ma nieli ni-  
totajtzi huan nechtlaxtlahuía huan yeca nitequiti  
nica.

<sup>5</sup> Huajca nopa maculti tlacame quiilhuijque:

—Xijtlatzintoquili Toteco Dios sintla quisas  
cuali totequi huan sintla cuali toojhui.

<sup>6</sup> Huan nopa levita tlacatl tlananquili:

—Quena, nochí quisas cuali, huan TOTECO an-  
mechpalehuis.

<sup>7</sup> Huan nopa maculti iixhuihua Dan  
quisque huan ajsitoj campa altepetl Lais,  
huan quiitaque ipan nopa tlali para amo  
aqui motequipachohuayaya ica niyon se  
tleno. Nochi cuali monahuatiyayaj huan  
quipiyayayaj nochí tlamantli. Itztoyaj ica  
temachtli quen nopa masehualme ipan altepetl  
Sidón. Amo tleno quincuesohuayaya, niyon  
amo aqui quinnahuatiyaya. Huan nojquiya  
campa mocahuayayaj nopa Lais ehuani, huejca  
quiitayayaj altepetl Sidón. Huan Lais ehuani  
amo tlanemacayayaj ica sequinoc, niyon amo  
tlacohuayayaj tlen sequinoc, pampa nochí  
quipiyayayaj. <sup>8</sup> Huan nopa maculti tlacame  
mocuepque hasta campa hualajque campa  
itztoyaj ininteiximatcahua ipan altepetl Zora  
huan Estaol. Huan quintlatzintoquilijque:

—¿Quenicatza tlael toc campa antlajtlachiyatoj?

<sup>9</sup> Huan nopa macuilty tlacame tlananquilijque:  
—Xihualaca, ma tiquinhuilanatij, pampa tojuanti tijtlachilitoj nopa tlali huan tiquitatoj para nelcuali. Amo xijchiyaca. Nopa tlali elis toaxca sintla san timoaxcatitij. <sup>10</sup> Quema tiyase nopona, tiajsitij campa masehualme catli amo quema motequipachohuaj huan itztoque ipan se tlali catli hueyi huan nochí quipiya. Huan Toteco Dios techmactilijtoc tomaco.

<sup>11</sup> Huajca quistejque tlen altepeme Zora huan Estaol, 600 tlahuilanca tlacame catli iixhuihua Dan ica inintepos para tlahuilanase. <sup>12</sup> Huan yajque mochihuatoj nechca altepetl Quiriat Gearim ipan tlali Judá. Huan yeca quitocaxtijque Campa Mochijqui Dan, huan hasta ama quen nopa itoca. Eltoc ica campa huetzi tonati nechca altepetl Quiriat Gearim. <sup>13</sup> Huan teipa quisque nopona, huan panoque campa tepeyo ipan tlali Efraín huan ajsique hasta campa ichaj Micaía. <sup>14</sup> Huan nopa macuilty tlacame catli achtihuiya yajque quitlachilitoj campa altepetl Lais, quen ni quinilhuijque nopa sequinoc tlacame:

—¿Anquimatij para ipan ni cali eltoc nopa yolix-pantzajcayotl huan pilteteyotzitzí, huan nopa teteyotl catli quitejtectoque huan se catli quisencajque tlen plata? Sintla tijcuise iteteyohua, tijpiyase catli tijhueyichihuase ipan totlal quema timoaxcatise.

<sup>15</sup> Huan quema ajsitoj ichaj nopa levita telpocatl catli eltoya nechca ichaj Micaía, quitlatzintoquilijque quenicatza itztoc. <sup>16</sup> Huan nopa 600 tlahuilanca tlacame tlen iixhuihua Dan itztoyaj puertajteno huan cuali mocuallalijtoyaj

ica inintepos para tlahuilanase. **17-18** Huan  
nopa maculti tlacame catli achtihuiya  
quitlachilitoj nopa tlali monechcahuitoj ichaj  
Micaía. Huajca calaquitoj huan quincuitoj nopa  
teteyome, nopa yolixpantzajcayotl, huan nopa  
pilteteyotzitzí, quema nopa totajtzi mocahuayaya  
cuapuertajteno inihuaya nopa 600 tlacame ica  
inintepos para tlahuilanase. Huan nopa levita  
totajtzi quintlatzintoquili:

—¿Tlaque anquichihuaj?

**19** Huan quinanquilijque:

—Amo ximolini. Xihuala tohuaya para tielis  
titototajtzi. ¿Amo tiquita para más cuali tielis  
titototajtzi ipan tohueyi familia huan amo san  
titotajtzi ipan se cali campa itztoc setzi tlacatl?

**20** Huan nopa levita totajtzi yolpajqui huan  
quicuic nopa yolixpantzajcayotl, nopa piltetey-  
otzitzí, huan ne sequinoc teteyome huan ya-  
jqui inihuaya. **21** Huan nopa tlacame sempa  
pejque nejnemij ipan iniojhui huan quintlaya-  
canaltijque ininconehua, inihuacaxhua huan in-  
ijuanti catli quihiucayayaj catli patiyo para más  
quinmocuitlahuise sintla Micaía quinhuilanaqui.  
**22** Huan quema iixhuihua Dan huejca quicajtej-  
toyaj ichaj Micaía, icalnechcahua Micaía mosentil-  
ijque ihuaya huan pejque quintoquilíaj. **23** Huan  
quintzajtzilijque iixhuihua Dan para ma moquet-  
zaca, huan inijuanti moicancuepque huan quiil-  
huijque Micaía:

—¿Tlaque tijpiya? ¿Para tlen tiquinsentilijtoc  
miyac tlacame?

**24** Huan Micaía tlananquili:

—Antechcuilijtejque noteteyohua catli nijsen-cajtoya huan nojquiya nopa totajtzi catli itztoya nohuaya. Amo tleno antechcahuilijtejque huan ¿noja antechlatzintoquilíaj tlaque nijpiya amo-huaya?

<sup>25</sup> Huan iixhuihua Dan quinanquilijque:

—Amo techtzajtzili chicahuac toica. Huelis se tlen ni tlahuilanca tlacame catli más mosisinía quinequis mitzmaquilis. O huelis mitzmictis ta ihuaya nochí mosoldados.

<sup>26</sup> Huan ica ya nopa, iixhuihua Dan quitoquili-jque iniojhui, huan Micaía quiitac para inijuanti nelía miyaqui para ya, huajca mocuepqui ichaj.

<sup>27</sup> Huan iixhuihua Dan quinhuicaque nopa teteyome catli Micaía quinsencajtoya ihuaya nopa totajtzi huan ajsitej campa altepetl Lais campa amo aqui tlamocuitlahuiyaya pampa amo aqui majmahuiyaya. Huan calajque nopona, huan quintlamimictijque huan quitlatijque nopa altepetl. <sup>28</sup> Huan amo aqui huelqui quinmanahuía pampa huejca quiitayayaj altepetl Sidón huan amo aqui ihuaya monojnotzayayaj. Huan ni altepetl eltoya ipan nopa tlamatayamitl nechca altepetl Bet Rehob. Huan teipa iixhuihua Dan sempa pejque quisencahuaj altepetl Lais huan nopona mocajque. <sup>29</sup> Huan quitocaxtijque nopa altepetl Dan quen ininhuejcapan tata Dan catli eltoya iconé Israel. Pero achtihuiya nopa altepetl itoca eltoya Lais.

<sup>30</sup> Huan iixhuihua Dan quintlalijque nopa teteyome para quinhueyichihuase huan inintotajtzi eltoya nopa telpoca tlacatl, Jonatán, catli eliyaya iconé Gersón huan iixhui Moisés. Huan Jonatán

ihuaya iconehua elque inintotajtzitzi nopa hueyi familia Dan hasta nopa tonali quema inincualancaitacahua moaxcatijque nopa tlali huan quinhuicaque ilpitoque.<sup>31</sup> Huajca nopa hueyi familia Dan quinhueyichihuayayaj teteyome catli Micaáa quinsencajtoya nochí nopa tonali quema ichaj Toteco Dios moquetztoya ipan Silo.

## 19

### *Se levita tlacatl huan iompaca sihua*

<sup>1</sup> Nojquiya ipan nopa tonali quema israelitame ayamo quipiyayayaj se tlanahuatijquetl ipan intlal, itztoya se levita tlacatl catli mocahuayaya campa cuatitlamitl ipan nopa tepeme ipan tlali Efraín. Huan mocuili seyoc sihuatl quen iompaca sihua huan yaya ehuayaya altepetl Belén ipan tlali Judá.<sup>2</sup> Pero teipa nopa sihuatl momecati ica seyoc tlacatl. Teipa quistejqui huan yajqui ichaj itata ipan tlali Belén, huan nopona mocajqui quen nahui metzli.<sup>3</sup> Huan teipa ihuehue motlanantejqui huan quitoquili para quinojnotzati ica tlaicnelili para ma mocuepaihuaya. Huan nopa tlacatl nojquiya quihiucac se itequipanojca huan se ome burrojme. Huan nopa sihuatl quiseli ihuehue ica cuali huan quihiucac ichaj itata para ma quiiximatis.<sup>4</sup> Huan quema itata nopa sihuatl quinamijqui nopa tlacatl, paquiyaya para quiiximatis. Huan imonta quiseli nopa tlacatl ica paquilibrium huan quinequiyaya ma mocahua para quinpaxalos. Huan mocajqui ichaj imonta nopa levita tlacatl para eyi tonali, huan tlacuajque, huan tlaique huan mopaquilismacaque san sejco.

<sup>5</sup> Huan ipan nahui tonali, nochi mejque cualca, huan nopa levita mocuallali para mocuepas itlal, pero imonta quiilhui para achtilhui ma tlacuajtehua. <sup>6</sup> Huan sempa mosehuijque huan tlacuajque san dejco. Huan teipa itata nopa sihuatl quiilhui nopa levita tlacatl:

—Nijnequi ximocahua sempa ni yohuali huan san dejco tiyolpaquise.

<sup>7</sup> Huan quema nopa levita tlacatl moquetzqui para yas, imonta quichihualti sempa ma mocahua. Huajca nopa yohuali sempa mocajqui noppa. <sup>8</sup> Huan ica macuili tonali, mejqui cualca para yas ichaj, pero itata nopa sihuatl sempa quiilhui:

—Ximocahua sempa ni tonali huan hasta tiotlac tiyas. Huan sempa tlacuajque san dejco.

<sup>9</sup> Teipa nopa levita tlacatl motlananqui para yas ihuaya isihua huan itequipanojca. Pero imonta catli eliyaya itata nopa sihuatl quiilhui:

—Ya tiotlac, ximocahua nohuaya sempa huan tiilhuichihuase huan tipaquise. Mostla cualca amehuase huan anyase amochaj.

<sup>10</sup> Pero nopa levita tlacatl ayacmo quinejqui mocahuas nopa yohuali, huajca motlananqui huan quistejqui. Teipa ajsito hasta iixmelac altepetl Jebús catli nojquiya itoca Jerusalén. Huan ihuaya yohuiyayaj isihua huan ome burrojme catli quipiyayayaj ininsiya.

<sup>11</sup> Huan quema ajsitoj altepetl Jebús, ya tlapoyahuixtoya, huan itequipanojca quiilhui nopa levita:

—Ya tlayohua. Más cuali ma ticalaquica ni altepetl campa itztoque jebuseos para ticochise.

**12** Pero nopa levita quinanquili itequipanojca:

—Amo ticalaquise ipan ni altepetl ica seyoc xi-nachtli masehualme. San tiyase campa itztoque israelitame. **13** Huajca xihuala huan tiyase ipan altepetl Gabaa (o Ramá) huan nopona timocahuase.

**14** Huajca panoque nopa altepetl huan ya-jque ipan iniojhui. Huan ya eliyaya tlayohua quema ajsicoj ipan altepetl Gabaa catli eliyaya iniaxca israelitame catli iteipan ixhuihua Benjamín. **15** Huan calajque nopona para tonilise. Huan mosehuitoj tianquis pampa amo aqui quin-macayaya campa mocahuase. **16** Pero teipa huala-jqui se tlacatl huehuentzi catli mocuepayaya nel tiotlac tlen itequi ipan imila. Yaya elqui se iteipan ixhui Efraín catli ehuayaya campa tepeme ipan tlali Efraín, huan sanoc ajsitoya para itztos ipan altepetl Gabaa, pero sequinoc Gabaa ehuani eliyayaj iteipan ixhuihua Benjamín. **17** Huan quema nopa huehuentzi quinitac nopa paxalohuani mosehuijtoque ipan tianquis, huajca quinlhui:

—¿Canque anyohuij huan canque anhualahuij?

**18** Huan nopa levita tlacatl quinanquili:

—Na niehua tlali Efraín. San tipanoj nica. Tiquistejque altepetl Belén ipan tlali Judá huan ama timocuepaj nochaj, pero ayamo aqui tech-macatoc campa timocahuase. **19** Tojuanti tijhual-icaj sacatl catli huactoc huan sequinoc tlacual-istli para totlapiyalhua huan nojquiya tijhualicaj tlacualistli huan tlaili para na, nosihua huan note-quipanojca, huajca amo tleno techpolohua.

**20** Huan nopa tlacatl catli huehuentzi quiijto:

—¡Amo ximotequipacho! Nochi catli motechmonequi na nocuenta elis, san amo nijnequi ximocahuaca ni yohuali ipan tianquis pampa mahuilili.

<sup>21</sup> Huan quinhuicac ichaj, huan quintlamacac inintlapiyalhua huan quinicxipajpajqui quen momajtoyaj quichihuaj. Huan san sejco tlacuajque huan tlaique. <sup>22</sup> Huan quema onpejtoya mopaquilismacaj, hualajque mosisinijsca tlacame catli ehuaj nopona huan quiyahualo que nopa cali campa mocajtoyaj. Huan pejque quitajtacaníaj cuapuerta, huan quinojnotzque nopa huehuentzi catli iaxca nopa cali huan quen ni quiilhuijque:

—Xijquixti nopa tlacatl catli itztoc mocalijtic para ihuaya ticochise.

<sup>23</sup> Huan quisqui nopa huehuentzi catli iaxca nopa cali huan quinilhui:

—Amo, noicnihua, amo xijchihuaca catli nelía fiero. Ni tlacatl mosiyajquetztoch nochaj para ma nijmocuitlahuis. Amo xijchihuaca catli amo cuali.

<sup>24</sup> Nica itztoc noichpoca catli amo quema quiiximajtoc se tlacatl, huan nojquiya itztoc nica isihua ni tlacatl. Niquinquixtis huan huelis anquinhuahuitase huan anquinchihuile catli anquinequij, pero ni tlacatl amo tleno xijchihuilica.

<sup>25</sup> Pero nopa tlacame amo quitlacaquilijque, huan yeca nopa levita quiqxiti isihua huan quinmacac. Huan nopa tlacame quiitzquijque nopa sihuatl huan san ica mahuiltijque huan tlen hueli quichihuilijque nochi yohuali hasta ijnaloc. Huan quicajque quema ya tlanestihuala.

<sup>26</sup> Huan quema tlanestihualayaya, nopa sihuatl

mocuepasnequiyaya ipan ichaj nopa huehuentzi, pero san ajsic puertajteno huan huetzqui. Huan nopona mocajqui hasta tlanesqui. <sup>27</sup> Huan nopa levita tlacatl mejqui cualca, huan caltlapo para quisas. Huan quipanti isihua huetztoya ipuertajteno nopa cali, huan imax quitlalijtoya ipan caltencuahuitl.

<sup>28</sup> Huan nopa levita quilhui isihua:

—Ximehua, ma ya tiyaca.

Pero nopa sihuatl amo quinanquili pampa ya mictoya.

Huajca nopa levita tlacatl quitlananqui nopa sihuatl, huan quitlali ipan iburro huan yajqui ichaj.

<sup>29</sup> Huan quema ajsito ichaj, quicuic se cuchillo huan quitzozontejqui campa sajsalijtoc iomiyo huan quichijqui 12 tlacotomitl. Teipa quititlanqui se tlacotomitl ipan sesen nopa 12 huejhueyi familias ipan tlali Israel para quinnextilis catli ini-israelita icnihua quichihuiliijtoyaj. <sup>30</sup> Huan nochicatli quiitaque nopa quentzi itlacayo quijitoque:

—Amo quema tiquitztoque se tlamantli quen ni. Amo quema panotoc se tlamantli catli nelia fiero quen ni hasta nopa tonali quema tohuejcapan tatahua tiisraelitame quisque tlen tlali Egipto huan hasta ama. Ma timoilhuica tlen ni tlamantli huan tlaque tijchihuase para tiquintlatzacuiltise catli quichijque.

## 20

*Nochi israelitame quintlatzacuiltijke  
benjaminitame*

<sup>1</sup> Huajca mosentilijque nochicatli israelitame campa hueli ehua. Hualajque tlen tlali Dan ica

huejcapa hasta altepetl Beerseba ica tlatzintla huan hasta tlali Galaad ica campa hualquisa tonati. Huan nochí mosentilijque iixpa TOTECO ipan altepetl Mizpa para quintlajtolsencahuase catli quichijque ni tlamatli. <sup>2</sup> Huan nopona moixnextijque nochí tlayacanani tlen sesen hueyi familia ipan iteipan ixhuihua Israel. Huan nojquiya itztoyaj nopona 400 mil israelita soldados ica ininmachete. <sup>3</sup> Huan iteipan ixhuihua Benjamín nima quimatque para nochí sequinoc israelitame mosentiliyayaj ipan altepetl Mizpa, pero amo yajque nopona. Huan ipan nopa hueyi tlasantilistli nopa israelitame quitlatzintoquilijque nopa levita tlacatl quenicatza elqui para isihua mijqui. <sup>4</sup> Huajca nopa levita tlacatl catli eliyaya ihuehue nopa sihuatl quiijto:

—Na niajsito ihuaya nosihua para titonilise ipan altepetl Gabaa catli eltoc ipan inintla nopa benjaminitame. <sup>5</sup> Huan nopa yohuali miyac Gabaa ehuani quiyahualoqque nopa cali campa nimocajtoya pampa quinequiyayaj nechmictise na, pero elqui nosihua catli injuanti tlen hueli quichihuilijque. Nochi panoque ipani hasta quimictijque. <sup>6</sup> Huajca na nijcuic nosihua huan nijtzojtzontejqui huan nijchijqui 12 tlacotomitl. Huan nijtitlanqui ipan nochí tlali Israel para ma quimatica ni hueyi tlajtlacoli catli panotoc. Huan niquijto:

<sup>7</sup> —¡Techtlacaquilica nochí anisraelitame! Techconsejomacaca tlaque monequi tiquinchihuilise catli quichijtoque ni tlamatli.

<sup>8</sup> Huajca nochí nopa hueyi tlanechicoli mochijque quen san se tlacatl huan motlananque huan

quiijtojque:

—Nyon se tlen tojuanti amo mocuepas ichaj ama, niyon amo yas campa timochijtoque hasta tiquintlatzacuiltise catli quichijque ni tlamantli. <sup>9</sup> Ya ni catli tijchihuase. Tiquinhuilanatij catli itz-toque ipan altepetl Gabaa huan timoaxcatise inttal. <sup>10</sup> Pero achtihui monequi tlacame ma quite-moca tlacualistli para nochí tojuanti. Tiquint-lapejpenise 10 tlacame tlen sesen 100 tlacame, o 100 tlacame ipan sesen 1000 tlacame, o se mil ipan sesen 10 mil tlacame. Huan ni tlacame catli tiquintlapejpenise ipan nochí huejhueyi familias ipan Israel quitemose tlacualistli. Huan tojuanti tiquinhuilanatij nopa Gabaa ehuani, in-juanti catli benjaminitame, pampa fiero quichi-jtoque ica nochí tiisraelitame.

<sup>11</sup> Huajca nochí tlacame ipan tlali Israel san sejco motlalijtoyaj quen san se tlacatl para qui-huilanatij nopa altepetl.

<sup>12</sup> Pero achtihui nopa israelitame quintitlanque tlacame ma quintlatzintoquilitij nochí benjaminitame: “¿Tlaque ni tlamantli catli nelía fiero catli mochijtoc campa amojuanti? <sup>13</sup> Techmactilica nopa mosisinijca tlacame ipan altepetl Gabaa catli quichijque ni tlamantli para tiquinmictise huan tijquixtise ni tlajtlacoli ipan totlal Israel.”

Pero nopa benjaminitame amo quintlacaquil-ijque ne sequinoc israelitame, masque eliyaya jininteiximatcahua. <sup>14</sup> Huan iteipan ixhuihua Benjamín quistejque tlen nochí inialtepehua huan mosentilijque. Teipa yajque altepetl Gabaa para quinpalehuise Gabaa ehuani ma quinhuilanatij ne sequinoc israelitame catli

hualajtoyaj para quinhuilanaquij. <sup>15</sup> Huan benjaminitame catli hualajque tlen miyac altepeme mochijque 26 mil tlacame nochia ica ininmachetes. Huan mosansejcotilijque inihuaya nopa 700 Gabaa ehuani catli tlapejpenilme para tlahuilanase. <sup>16</sup> Huan ipan nopa benjaminitame itztoyaj seyoc 700 tlacame catli maopochtique huan nelia cuali quimatque tlatehuitlatzhuiáj. Huelque quiajsij tlen hueli, masque huejca quiitayayaj. <sup>17</sup> Pero ne sequinoc israelita tlacame catli hualajque tlen ne sequinoc huejhueyi familias catli amo benjaminitame mochijque 400 mil. Huan nochia itztoyaj tlacame catli motemacayayaj para tlahuilanase huan quihuicayayaj inintepos.

<sup>18</sup> Teipa nopa miyaqui israelitame yajque ichaj Toteco Dios ipan altepetl Betel para quitlatzinto-quilitij tlaque quichihuase. Huan quitlatzinto-quilitoj Toteco Dios: “¿Catlique nopa hueyi familia itlacahua achtihui monequi yase quinhuilanatij nopa tlacame tlen ne hueyi familia Benjamín?”

Huan TOTECO quinnanquili: “Itlacahua nopa hueyi familia Judá achtihui yase.”

### *Nopa tlahuilancayotl ica nopa hueyi familia Benjamín*

<sup>19-20</sup> Huajca ica ijnaloc motlanantejque nopa miyaqui israelitame tlen campa hueli altepeme para yase quinhuilanatij Gabaa ehuani catli benjaminitame. <sup>21</sup> Huan tlacame catli iteipan ixhuihua Benjamín quisque altepetl Gabaa huan quinmictijque 22 mil ne sequinoc israelitame ipan nopa tonal. <sup>22-23</sup> Huan nopa israelitame yajque

quicamanalhuitoj TOTECO huan iixtla choaque hasta tiotlac. Huan quitlatzintoquilijque tlaque monequi quichihuase. Quiijtojque: “TOTECO, ¿monequi timocuepase huan sempa tiquinhuilanatij nopa tlacame tlen nopa hueyi familia Benjamín catli itztoque toicnihua?”

Huan TOTECO quinnanquili: “Quena, xiyaca huan xiquinhulanatij.”

Huajca nopa israelitame moyolchicajque, huan sempa mocualtlalijque huan yajque campa achtihui motlalijtoyaj para tlahuilanatij.

<sup>24</sup> Huan nopa miyaqui israelitame sempa monechcahuitoj campa nopa benjaminitame para quinhulanase. <sup>25</sup> Huan nopa benjaminitame quisque altepetl Gabaa, huan quinhulanacoj huan quinmictijque seyoc 18 mil israelitame ica machetes.

<sup>26-27</sup> Huajca nochí nopa miyaqui israelita tlacame yajque campa ichaj Toteco Dios ipan Betel pampa ipan nopa tonali icaxa TOTECO eltoya nopona ipan Betel para se quesqui tonali. Huan nopona mocajque iixpa TOTECO huan sempa choaque. Pero ama, quena, nochí mosajque huan quitemojque ipaquilis TOTECO ica nochí ininyolo hasta tiotlac. Huan quimacaque TOTECO tlacajcahualistli tlatlatili huan tlacajcahualistli para ma onca tlayoltlalili ihuaya, huan quitlatlanijque itlapalehuil. Huan sempa nopa israelitame quitlatzintoquilijque Toteco Dios tlaque monequi quichihuase. <sup>28</sup> Huan ipan nopa tonali Finees itztoya totajtzi. Finees eliyaya icono Eleazar huan iixhui Aarón. Huan nopa israelitame ica Finees quitlatzintoquilijque Toteco quej

ni: “¿Monequi timocuepase sempa para tiquinhuilanatij iteipan ixhuihua Benjamín catli toteiximatcahua o san nica tijtlamiltise?”

Huan Toteco quinnanquili: “Xiyaca huan xiquinhuilanatij sempa mostla, pampa mostla niquintemactilis amomaco.”

<sup>29</sup> Huajca sequin tlen nopa miyaqui israelitame yajque motlatitoj yahualtic altepetl Gabaa <sup>30-31</sup> para tlajtlachiyase ichtacatzi huan teipa nimantzi calaquise ipan nopa altepetl. Huan ne sequinoc soldados catli quihuilanasquíaj nopa altepetl quinlhuijtejque para quema ya calactose ipan altepetl huan moaxcatijtose, quinyolmehahuase ica miyac poctli catli tlejcos. Huan quema ne sequinoc yajtoyaj motlatitoj, nopa sequinoc israelita soldados ica expa yajque huan mochijque quen quinhuilanasquíaj nopa benjaminitame ipan altepetl Gabaa senquistoc quen achtihiuya quichijque huan motlalijque quen quichijtoyaj achtihiui. Huan nopa benjaminitame nojquiya quisque altepetl Gabaa quen achtihiui para quinnamiquitij pero ama más quintoquilijque huan huejca quicajtejque inialtepe. <sup>32</sup> Huan nopa benjaminitame pejque quinmictíaj ne sequinoc israelitame quen achtihiuya panoc. Huan quinmictijque campa nopa cuatitlamitl ipan ojtli catli yohui tlen altepetl Gabaa hasta Betel huan quinmictijque quen 30 israelita soldados.

Huan nopa benjaminitame nelía paquiyayaj huan moilhuiyayaj: “Sempa tiquntlanise san quen achtihiui.”

Pero nopa israelitame san quichihuayayaj quen cholohuayayaj para quej nopa, nopa

benjaminitame ma quintoquilica huan ma quicajtehuaca huejca inialtepe. <sup>33</sup> Huan quema nopa israelita soldados ajsitoj nechca Baal Tamar, moicancuepque huan pejque quinhuilanaj nopa Gabaa ehuani huan nopa sequinoc iixhuihua Benjamín catli quistoyaj inialtepe. <sup>34</sup> Huan nimantzi nopa 10 mil israelita soldados catli tlapejpenilme catli motlatijtoyaj ipan nopa tlamayamitl nechca altepetl Gabaa nojquiya quisacoj huan pejque quinhuilanaj nopa benjaminitame. Huan nopa tlahuilanalistli mochijqui más chicahuac. Huan nopa benjaminitame amo quimatiyayaj para quinhuilanayayaj ica iniixmelac huan ica iniica huan para quipolose. <sup>35</sup> Huajca quej nopa TOTECO quinpalehui nopa miyaqui israelitame para ma quintlamiltica nopa israelita tlacame catli itztoyaj iteipan ixhuihua Benjamín. Huan nopa tonali quinmictijke 25 mil 100 benjaminita soldados ica machete. <sup>36</sup> Huajca momacaque cuenta para ya quipolojque. <sup>37</sup> Huan nopa sequinoc tlacame catli motlatijtoyaj quicajtejque campa quintzontlamiltiyayaj Gabaa ehuani, huan nimantzi calaquitoj ipan altepetl Gabaa huan quintlamimictitoj nochí catli itztoyaj nopona. <sup>38</sup> Huan quema nopa poctli pejqui tlejco ipan nopa altepetl hasta ilhuicac, nopa benjaminitame moicanitaque huan quiitaque. <sup>39</sup> Huan nopa benjaminitame pejque momajmatíaj quema nopa sequinoc israelitame catli mochijque quen cholohuayayaj, moicancuepque para quinhuilanaquij. <sup>40-42</sup> Nopa

benjaminitame quiitaque para nochí inijuanti miquisquíaj, huajca quinequiyyaj cholose huan yase campa huactoc tlali. Pero nopa miyaqui israelitame quinhuilanayayaj iniixmelac huan iniica huan quinmictiyayaj huan amo huelque cholose. <sup>43</sup> Huan nopa miyaqui israelitame quinyahualojque nopa benjaminitame huan quintepotztocatiyajque. Huan quinmictijiyajque hasta altepetl Menúha huan hasta iixmelac altepetl Gabaa campa hualquisa tonati. <sup>44</sup> Huan quinmictijque 18 mil benjaminita soldados catli motemacayayaj huan cuali quimatque tlahuilanaj. <sup>45</sup> Huan nopa benjaminitame catli mocajque cholosnequiyyaj para campa huactoc tlali campa eltoc nopa tetl Rimón. Pero macuili mil quinmictijque ipan ojtli huan noja quintepotztocatiyajque hasta altepetl Gidom. Huan nopona quinmictijque seyoc ome mil tlacame.

<sup>46</sup> Huajca ipan nopa tonal nopa miyaqui israelitame quinmictijque ica ininmachete pano 25 mil israelitame tlen iixhuihua Benjamín, huan nochí eliyayaj tlacame catli cuali quimatque tlahuilanaj. <sup>47</sup> Huan san mocajque yoltoque 600 benjaminita soldados. Inijuanti cholojque hasta campa nopa huactoc tlali huan mocajque nopona nahui metzatlí nechca nopa tetl itoca Rimón. <sup>48</sup> Huajca ipan nopa tonal nopa israelitame quinmictijque nochí sequinoc benjaminitame huan inintlapiyalhua. Huan yajque ipan nochí benjaminita altepeme ipan nopa tlali huan quitlamitlatijque.

## 21

*Quinpalehuijque benjaminitame ma sempa momiyaquilica*

<sup>1</sup> Quema nopa tlayacanca israelitame mosentilijque achtihiuya nepa altepetl Mizpa para quimachilise quenicatza mijqui isihuua nopa levita tlacatl, injuanti quitestigojquetzque Toteco para amo aqui quicahuilisquiáj ma temactili iichpoca para ma monamictis ihuaya se benjaminita tlacatl. <sup>2</sup> Huan teipa quema nopa israelitame ya quintlamimictijtoyaj nopa benjaminitame, sempa mosentilijque ipan Betel campa eltoya icaxa Toteco Dios. Huan choaque chicahuac iixpa Toteco Dios hasta tlayohuixqui huan quej ni quijjtohuayayaj:

<sup>3</sup> “¡Ay TOTECO Dios titoTECO tiisraelitame!

¿Para tlen panoc ya ni ipan tlali Israel?

¿Para tlen ixpolihuis se hueyi familia?”

<sup>4</sup> Huan hualmostla cualca mejque nochí nopa israelitame huan quichijque se tlaixpamitl. Huan quitencahuilijque TOTECO tlacajcahualistli tlatlatili huan tlacajcahualistli para moyoltlalise ihuaya. <sup>5</sup> Huan tlatzintocaque: “¿Itztoc acajya tlen tiisraelitame catli amo yajqui ipan nopa tlanechicoli ipan altepetl Mizpa campa eltoc icaxa TOTECO huan campa timotlajtolmacaque para amo tijmacase se iteipan ixhui Benjamín se toichpoca? Nochi quimatiyayaj sintla amo yasquiáj, miquisquiáj.”

<sup>6</sup> Huan nopa israelitame motequipachohuayayaj por catli inin pantitoya nopa benjaminitame huan moilhuiyayaj: “Se hueyi

familia san tlapic ixpolihuisnequi ipan tlali Israel. ¿Quenicatza tijchihuase para tiquintemolise sihuame nopa benjaminita tlacame catli noja mocahuaj yoltoque? <sup>7</sup> Nochi tojuanti ica titlategojquetzque TOTECO ipan altepetl Mizpa para amo tiquinmacase toichpocahua para ma elica ininsihuajhua.”

<sup>8</sup> Huan quipantijque para nopa israelitame catli itztoyaj ipan altepetl Jabel ipan tlali Galaad amo yajtoyaj, <sup>9</sup> pampa amo aqui itztoya para tlanan-quilis tlen nopa altepetl quema quipanoltijque lista ipan tlanechicoli. <sup>10</sup> Huajca nopa hueyi tlasentililistli tlen israelitame quintitlanque 12 mil soldados catli más motemacayayaj para quin-mictise nopa Jabel ehuani huan quen ni quinil-huijque: “Xiyaca huan xiquinmictitij catli itz-toque ipan altepetl Jabel ipan tlali Galaad, pampa amo monextijque ipan tohueyi tlasentililis tlen nochi tiisraelitame. <sup>11</sup> Xiquinmictica nochi tlacame, huan nochi sihuame catli ya monamic-tijtoque, huan nochi coneme, pero ichpocame, amo.”

<sup>12</sup> Huan ipan altepetl Galaad quinpantijque 400 ichpocame catli ayamo monamictijtoyaj huan quinitzquijque huan quinhualicaque campa qui-quetztoyaj ininyoyoncalhua ipan altepetl Silo catli eltoc ipan tlali Canaán.

<sup>13</sup> Huajca nochi nopa tlasentililistli tlen israelitame tlanahuatijque ma quintemoca nopa benjaminita tlacame catli motlatiyayaj nechca Tetl Rimón para quinilhuese ma moyoltlaliquij inin-huaya. <sup>14</sup> Huan nopa benjaminita tlacame hualajque huan quinmactilijque nopa 400 ichpocame

catli quincuitoj ipan altepetl Jabel. Pero amo quinaxili para nochime, huan miyac tlacame amo quinselijque. <sup>15</sup> Huan nopa israelitame tlahuel motequipachohuayayaj pampa TOTECO quichijtoya ma ixpolihui se hueyi familia ipan iixhuihua Israel.

<sup>16</sup> Huajca nopa huehue tlacame catli quinyacanayayaj israelitame sempa moilhuijque: “¿Canque tiquincuse sihuame para tiquinmactilise nopa benjaminita tlacame catli quinpolohua sihuame, pampa tiquinmictijque nochi ininsihuajhua?”

<sup>17</sup> Tlahuel monequi tiquinpantilise sihuame nopa benjaminitame para se hueyi familia amo polihuis ipan tlali Israel. <sup>18</sup> Pero tojuanti amo hueli tiquinmacase toichpocahua, pampa nochi tiisraelitame tijtestigoquetzque TOTECO huan tiquijtojque: “Ma eli tlatchihuali aqui temactilis iichpoca para ma eli isihua se benjaminita tlacatl.”

<sup>19</sup> Huan nopa huehue tlacame tlen Israel san sejco moilhuijque para benjaminita tlacame hueli quinitzquise sihuame para iniaxca huan amo inijuanti quinmacasquíaj. Huajca quiijtojque: “Sesen xihuitl tiilhuichihuaj para TOTECO ipan nopa tlamayamitl nechca altepetl Silo. Tijpiyaj nopa ilhuitl nopona tlatlajco altepeme Betel huan Lebona nechca nopa ojli catli quisa Betel huan yohui hasta altepetl Siquem. Eltos ilhuitl nopona ojteno para campa hualquisa tonati.”

<sup>20</sup> Huajca nopa huehue tlacame tlen Israel quinnahuatijque nopa benjaminita tlacame ma yaca huan ma motlatitij xocomeca miltitla para

mocuilise se ichpocatl, <sup>21</sup> huan quen ni quinilhuijque: “Xiyaca ipan nopa tlamayamitl huan xitlachixtoca cuali. Huan quema anquinitase mijtotijtihualahuix ichpocame catli ehuaj altepetl Silo, xiquisase campa anmotlatijtoque, huan ximoitzquilica sese amojuanti se ichpocatl huan xiquinhuicaca amochajchaj ipan amotlal.”

Quej nopa quinilhuijque.

<sup>22</sup> Huan teipa quema hualase intintahua o iniicnihua nopa ichpocame huan techtlatzintoquiliquip para tlen tiquincahuilijtoque xiquinitzquiaca, tiquinnanquilise para ma quintlapojpolhuica huan ma quincahuilica ma mocuilica nopa ichpocame pampa amo tiquinajsique ichpocame para noch iinjuanti quema tiquinhuilanatoj altepetl Jabels ehuani. Tiquinilhuese para amo quihuicase tlajtlacoli ipan ya ni pampa amo quintemactilijque iniichpocahua.

<sup>23</sup> Huajca nopa benjaminita tlacame quichijque quen quinilhuijque, huan sesen inijuanti quichejqui se ichpocatl quema mijtotiyayaj huan quinhuicaque campa inintlal. Huan nopa benjaminitame sempa pejque momiyaquilíaj huan pejque quisencahuaj nopa altepeme catli polijtoya huan nopona mocajque para itztose. <sup>24</sup> Teipa noch nopa israelita tlacame catli mosentilijtoyaj, quisque. Huan sesen yajqui campa ichaj ipan nopa tlali catli ihueyi familia quiselijtoya para iniaxca.

<sup>25</sup> Huan ipan nopa tonali amo aqui tlanahuatiyaya ipan noch tlali Israel. Nochi masehualme

JUECES 21:25

xcix

JUECES 21:25

san quichihuayayaj catli quinequiyayaj huan catli  
quiitayayaj para cuali.

**Icamanal toteco; Santa Bíblia  
Bible without Deuterocanon in Nahuatl, Huasteca  
Occidental (MX:nhw:Nahuatl, Huasteca Occidental)**

copyright © 2005 Wycliffe Bible Translators, Inc.

Language: Nahuatl, Huasteca Occidental

Translation by: Wycliffe Bible Translators, Inc.

Náhuatl, Huasteca Occidental [nhw], Mexico

**Copyright Information**

© 2005, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The Bible without Deuterocanon**

in Nahuatl, Huasteca Occidental

**© 2005, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

ci

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

0d0cfbfa-2c44-59e4-b00b-2ef5eb44b02d